

Broj: 03-02-1910/2024
Sarajevo, 12.12.2024. godine

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

**PARLAMENT FEDERACIJE
BOSNE I HERCEGOVINE**

- Predstavnički dom -
gosp. Dragan Mioković, predsjedavajući

- Dom naroda -
gosp. Tomislav Martinović, predsjedavajući

Primljeno: 16-12-2024			
Org. jed.	Broj	Priloga	Vrijednost
01,02	- 02 -	2606	24

Poštovani,

U skladu sa članom IV.B.3.7.c) (III) Ustava Federacije Bosne i Hercegovine, a u vezi sa čl. 178. i 179. Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08, 26/20 i 13/24) i sa čl. 171. i 172. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09, 24/20 i 60/24), radi razmatranja i usvajanja, dostavljam Vam **PRIJEDLOG ZAKONA O IZMJENAMA I DOPUNAMA KRIVIČNOG ZAKONA FEDERACIJE BOSNE I HERCEGOVINE**, koji je utvrdila Vlada Federacije Bosne i Hercegovine na 44. sjednici, održanoj 11.12.2024. godine.

Prijedlog zakona se dostavlja na službenim jezicima i pismima Federacije Bosne i Hercegovine u printanoj i elektronskoj formi (CD):

S poštovanjem,



Prilog:

- Prijedlog zakona na bosanskom jeziku,
- Odredbe Zakona koje se mijenjaju,
- Obrazac B tablica usklađenosti za više propisa,
- Obrazac 1a
- Obrazac 2,
- Obrazac IFP-NE i
- Krivični zakon Federacije Bosne i Hercegovine („Službene novine Federacije BiH“, br. 36/03, 37/03 – ispr., 21/04 - ispr., 69/04, 18/05, 42/10, 42/11, 59/14, 76/14, 46/16, 75/17 i 31/23)

Co: Federalno ministarstvo pravde
gosp. Vedran Škobić, ministar

PARLAMENT VEDEKATĚ
PRAHA

Průběh	8-12-2021
Org. jedn.	10.12.2021
Průběh	10.12.2021
Výsledky	10.12.2021



**BOSNA I HERCEGOVINA
FEDERACIJA BOSNE I HERCEGOVINE
VLADA**

„EI“

PRIJEDLOG

**ZAKON
O IZMJENAMA I DOPUNAMA KRIVIČNOG ZAKONA FEDERACIJE BOSNE I
HERCEGOVINE**

Sarajevo, decembar 2024. godine

ZAKON O IZMJENAMA I DOPUNAMA KRIVIČNOG ZAKONA FEDERACIJE BOSNE I HERCEGOVINE

Član 1.

U Krivičnom zakonu Federacije Bosne i Hercegovine („Službene novine Federacije BiH“, br. 36/03, 37/03 – ispr., 21/04 - ispr., 69/04, 18/05, 42/10, 42/11, 59/14, 76/14, 46/16, 75/17 i 31/23), iza člana 1. dodaje se novi član 1a. koji glasi:

„Član 1a.

(Usklađenost s pravnom stečevinom Evropske unije)

Ovim zakonom se u zakonodavstvu Federacije Bosne i Hercegovine djelimično preuzima Direktiva (EU) 2024/1385 Evropskog parlamenta i Vijeća od 14. maja 2024. godine o suzbijanju nasilja prema ženama i nasilja u porodici (SL L2024/1385).“

Član 2.

U članu 2. stav (12) mijenja se i glasi:

„(12) Dijete je osoba koja nije navršila 18 godina života.“

Stav (13) mijenja se i glasi:

„(13) Mlađa punoljetna osoba je osoba koja je u vrijeme učinjenja krivičnog djela navršila 18 a nije navršila 21 godinu života.“

Iza stava (13) dodaju se novi st. (14), (15), (16) i (17) koji glase:

„(14) Žrtva krivičnog djela je fizička osoba koja zbog učinjenog krivičnog djela direktno trpi tjelesne i duševne posljedice, imovinsku štetu ili povredu osnovnih prava i sloboda. Žrtvom krivičnog djela smatraju se bračni odnosno izvanbračni partner, intimni partner te potomak, a ako njih nema, predak, brat i sestra one osobe čija je smrt direktno prouzrokovana krivičnim djelom, te osobe koju je ona na osnovu zakona bila dužna izdržavati.

(15) Članovi porodice su: bračni partneri ili bivši bračni partneri i njihova djeca ili djeca svakog od njih, izvanbračni partneri ili bivši izvanbračni partneri i njihova djeca ili djeca svakog od njih, krvni srodnici i srodnici iz odnosa potpunog usvojenja u pravoj liniji bez ograničenja, a u pobočnoj liniji zaključno sa četvrtim stepenom, očuh, maćeha, posvojenik i usvojitelj iz odnosa nepotpunog usvojenja, srodnici po tazbini zaključno s drugim stepenom bez obzira na činjenicu da je bračna zajednica prestala, osobe koje

vezuje odnos starateljstva i udomiteljstva, osobe koje žive ili su živjele u istom domaćinstvu bez obzira na srodstvo, osobe koje imaju zajedničko dijete ili je dijete začeto iako nikada nisu živjele u istom domaćinstvu, nezavisno od toga da li učinitelj dijeli ili je dijelio domaćinstvo sa žrtvom.

(16) Bliske osobe su članovi porodice, te životni partner, bivši životni partner, sadašnji ili bivši partner u emotivnoj ili intimnoj vezi, nezavisno od toga da li učinitelj dijeli ili je dijelio domaćinstvo sa žrtvom;

(17) Životni partner je osoba koja s drugom osobom živi u zajednici koja ima trajniji karakter. “

Dosadašnji st. (14) do (22) postaju st. (18) do (26).

Stav (23) briše se.

Dosadašnji st. (24) do (35) postaju st. (27) do (38).

Iza stava (38) dodaje se novi stav (39) koji glasi:

„(39) Informaciono – komunikacijske tehnologije su postupci, metode, elektronska sredstva i programi koji omogućavaju prikupljanje, čuvanje, obradu, upravljanje, prijenos i prezentaciju kompjuterskih podataka i informacija u elektronskom obliku, kao i mrežna telekomunikacijska oprema koja omogućava ostvarivanje komunikacije, traženje, slanje, primanje i pristupanje kompjuterskim podacima i informacijama u elektronskom obliku.“

Dosadašnji stav (36) postaje stav (40).

Član 3.

Član 9. mijenja se i glasi:

„Član 9.

(Isključenje primjene krivičnog zakonodavstva u Federaciji prema djeci koja nisu navršila 14 godina života)

Krivično zakonodavstvo u Federaciji ne primjenjuje se prema djeci koja u vrijeme učinjenja krivičnog djela nisu navršila 14 godina života.“

Član 4.

Član 10. mijenja se i glasi:

„Član 10.

(Primjena krivičnog zakonodavstva u Federaciji prema djeci starijoj od 14 godina i mlađim punoljetnim osobama)

Prema djeci koja su u vrijeme učinjenja krivičnog djela starija od 14 godina i prema mlađim punoljetnim osobama primjenjuje se ovaj zakon ako posebnim zakonom nije drukčije propisano.“

Član 5.

U članu 14. stav (2) mijenja se i glasi:

„(2) Odredbe općeg dijela ovog zakona primjenjuju se prema djeci starijoj od 14 godina i mlađim punoljetnim osobama, osim ako posebnim zakonom nije drukčije propisano.“

Član 6.

U članu 16. iza stava (6) dodaje se novi stav (7) koji glasi:

„(7) Za krivična djela trgovine ljudima i organizirane trgovine ljudima, krivična djela protiv spolne slobode i morala, krivična djela spolnog zlostavljanja i iskorištavanja djeteta i krivična djela protiv braka, porodice i mladeži učinjena na štetu djeteta, zastarjelost krivičnog gonjenja počinje teći od punoljetstva žrtve.“

Član 7.

U članu 41. iza stava (1) dodaje se novi stav (2) koji glasi:

“(2) Učinitelju krivičnog djela iz koristoljublja novčana kazna se može izreći kao sporedna kazna i kad nije propisana zakonom ili kad je propisano da će se učinitelj kazniti kaznom zatvora ili novčanom kaznom, a sud kao glavnu izrekne kaznu zatvora.“

Član 8.

U članu 43. stav (3) mijenja se i glasi:

„(3) Kazna zatvora iz st. (1) i (2) ovog člana ne može se izreći djeci starijoj od 14 godina. Djeci starijoj od 16 godina može se izreći kazna maloljetničkog zatvora pod uvjetima propisanim posebnim zakonom.“

Član 9.

U članu 43a. stav (2) broj „100“ zamjenjuje se brojem „150“.

Iza stava (3) dodaje se novi stav (4) koji glasi:

„(4) Kazna zatvora izrečena u trajanju do jedne godine ne može se zamijeniti novčanom kaznom za krivična djela protiv ustavnog poretka Federacije, trgovine ljudima i organizirane trgovine ljudima, krivična djela protiv spolne slobode i morala, krivična djela spolnog zlostavljanja i iskorištavanja djeteta i krivična djela protiv braka, porodice i mladeži.“

Član 10.

U članu 43c. stav (4) mijenja se i glasi:

„(4) Osobama osuđenim za krivična djela protiv braka, porodice i omladine ne može biti određeno izvršenje kazne zatvora na način propisan u stavu (1) ovog člana.“

Član 11.

U članu 47. stav (3) broj „500“ zamjenjuje se brojem „1000“.

Član 12.

U članu 48. stav (3) broj „100“ zamjenjuje se brojem „150“.

Član 13.

U članu 49. iza stava (1) dodaje se novi stav (2) koji glasi:

„(2) Kod odmjerenja kazne za krivična djela protiv života i tijela, trgovine ljudima i organizirane trgovine ljudima, krivična djela protiv spolne slobode i morala, krivična djela spolnog zlostavljanja i iskorištavanja djeteta i krivična djela protiv braka, porodice i mladeži, ne mogu se uzeti kao olakšavajuće okolnosti kultura, običaji, religija, tradicija i takozvana čast.“

Dosadašnji st. (2) i (3) postaju st. (3) i (4).

Član 14.

U članu 51. stav (1) tačke e) i g) mijenjaju se i glase:

„e) ako je za krivično djelo kao najmanja mjera kazne propisana kazna zatvora ispod jedne godine, kazna se može ublažiti do 30 dana zatvora;

g) ako je za krivično djelo propisana novčana kazna s naznakom najmanje mjere, kazna se može ublažiti do pet dnevnih iznosa, a ako se izriče u određenom iznosu do 1000 KM“.

Član 15.

U članu 54. stav (5) iza riječi: „jedinstvenu kaznu“ dodaje se riječ „zatvora“.

Član 16.

U članu 57. stav (3) broj „100“ zamjenjuje se brojem „150“.

Član 17.

U članu 71. iza tačke e) dodaju se nove tač. kako slijedi:

„f) zabrana približavanja i komunikacije sa žrtvom;

g) udaljenje iz domaćinstva.“

Član 18.

Iza člana 78. dodaju se novi čl. 78a., 78b., koji glase:

„Član 78a.

(Zabrana približavanja i komunikacije sa žrtvom)

(1) Učinitelju krivičnog djela protiv života i tijela, krivičnog djela protiv spolne slobode i morala, krivičnog djela spolnog zlostavljanja i iskorištavanja djeteta, krivičnog djela protiv braka, porodice i mladeži kao i krivičnog djela uhođenja može se izreći sigurnosna mjera zabrane približavanja i komunikacije sa žrtvom, ako postoji opasnost da bi učinitelj mogao ponoviti takvo krivično djelo.

(2) Sigurnosna mjera zabrane približavanja i komunikacije sa žrtvom uključuje zabranu približavanja žrtvi na određenoj udaljenosti, zabranu pristupa u prostor oko mjesta stanovanja ili mjesta rada žrtve, kao i zabranu uznemiravanja ili komunikacije sa žrtvom, bilo putem informaciono-komunikacijskih tehnologija ili na drugi način.

(3) Sigurnosna mjera zabrane približavanja i komunikacije sa žrtvom može se izreći u trajanju koje ne može biti kraće od šest mjeseci ni duže od pet godina,

računajući od pravosnažnosti sudske odluke, s tim da se vrijeme izvršenja kazne zatvora ne uračunava u vrijeme trajanja ove mjere.

(4) Prema učinitelju krivičnog djela koji prekrši zabranu približavanja i komunikacije sa žrtvom određenoj u uvjetnoj osudi, može se postupiti po odredbi člana 66. Krivičnog zakona Federacije Bosne i Hercegovine (u daljem tekstu: Krivični zakon Federacije)

Član 78b.

(Udaljenje iz domaćinstva)

(1) Sigurnosnu mjeru udaljenja iz domaćinstva sud može izreći učinitelju krivičnog djela protiv života i tijela, krivičnog djela protiv spolne slobode i morala, krivičnog djela spolnog zlostavljanja i iskorištavanja djeteta, krivičnog djela protiv braka, porodice i mladeži, ako postoji opasnost da bi učinitelj mogao ponovo počinuti krivično djelo prema članu domaćinstva.

(2) Sigurnosna mjera udaljenja iz domaćinstva može se izreći u trajanju koje ne može biti kraće od šest mjeseci ni duže od pet godina, računajući od pravosnažnosti sudske odluke, s tim da se vrijeme izvršenja kazne zatvora ne uračunava u vrijeme trajanja ove mjere.

(3) Osoba kojoj je izrečena mjera iz stava (1) ovog člana dužna je, uz prisustvo policijskog službenika, odmah po pravosnažnosti presude napustiti stan, kuću ili drugi stambeni prostor koji čini domaćinstvo.

(4) Po proteku polovine trajanja sigurnosne mjere izrečene na osnovu stava (1) ovog člana, sud može, na prijedlog osuđenika, obustaviti njeno izvršenje, ako ustanovi da više ne postoji opasnost iz stava (1) ovog člana. Osuđenik može ponoviti prijedlog, ali ne prije proteka šest mjeseci od zadnjeg preispitivanja.

(5) Prema učinitelju krivičnog djela koji ne postupi po sigurnosnoj mjeri udaljenja iz domaćinstva ili koji prekrši ovu mjeru, može se postupiti po odredbi člana 66. Krivičnog zakona Federacije.“

Član 19.

Iza člana 78. naziv: „X - GLAVA DESETA PRAVILA O ODGOJNIM PREPORUKAMA, O ODGOJNIM MJERAMA I O KAŽNJAVANJU MALOLJETNIKA“ i čl. 79. do 109. brišu se.

Član 20.

U članu 110. stav (1) riječi: „i kazna maloljetničkog zatvora izvršavaju“ zamjenjuju se riječju „izvršava“.

Član 21.

Član 112. stav (1) mijenja se i glasi:

„(1) Osoba osuđena na kaznu zatvora ili kaznu dugotrajnog zatvora, koja je sposobna za rad, može raditi ukoliko ona na to pristane.“

Član 22.

U članu 113. stav (1) mijenja se i glasi:

„(1) Prema osobi koja je navršila 16 godina kazna maloljetničkog zatvora izvršava se u posebnim kazneno-popravnim ustanovama za maloljetnike. Prema osobi koja je navršila 18 godina života, ali nije navršila 23 godine života, kazna maloljetničkog zatvora se izvršava u posebnim ustanovama za mlađe punoljetne osobe ili u posebnom odjeljenju ustanove u kojoj se kazna izvršava prema punoljetnim osobama, pri čemu se osigurava da ona ne dođe u kontakt sa starijim zatvorenicima. Prema osobi koja je navršila 23 godine života prije kraja izdržavanja kazne ostatak kazne se izvršava u kazneno-popravnoj ustanovi za odrasle.“

Član 23.

U članu 121. stav (1) mijenja se i glasi:

„(1) Poslije izdržane, oprostene ili zastarjele kazne zatvora ili kazne dugotrajnog zatvora, osuđene osobe uživaju sva prava utvrđena ustavom, zakonom i drugim propisima i mogu sticati sva prava, osim onih koja su im ograničena sigurnosnom mjerom ili nastupanjem pravne posljedice osude.“

Član 24.

U članu 125. stav (4) mijenja se i glasi:

„(4) Osuda na kaznu dugotrajnog zatvora i osuda zbog krivičnih djela spolnog zlostavljanja i iskorištavanje djeteta te krivičnih djela trgovina ljudima i organizirana trgovina ljudima učinjenih na štetu djeteta se ne briše.“

Član 25.

U članu 166. stav (2) tačka e) na kraju rečenice tačka se zamjenjuje tačka-zarezom i dodaju nove tač. f) i g) koje glase:

- „f) ko usmrti člana porodice ili blisku osobu;
- g) ko usmrti dijete ili trudnu ženu.“

Član 26.

Član 170. mijenja se i glasi:

„Član 170. (Učestvovanje u samoubistvu)

- (1) Ko navede drugog na samoubistvo ili mu pomogne u samoubistvu, pa ono bude učinjeno ili pokušano, kaznit će se kaznom zatvora od šest mjeseci do pet godina.
- (2) Ko djelo iz stava (1) ovog člana učini prema djetetu koje je navršilo 14 godina ili prema osobi čija je sposobnost shvaćanja značenja svog djela ili upravljanja svojim postupcima bitno smanjena, kaznit će se kaznom zatvora od jedne do deset godina.
- (3) Ko djelo iz stava (1) ovog člana učini prema djetetu koje nije navršilo 14 godina ili prema osobi koja nije mogla shvatiti značaj svog djela ili upravljati svojim postupcima, kaznit će se po članu 166. (Ubistvo) stav (1) ovog zakona.
- (4) Ko okrutno ili nečovječno postupa s osobom koja se prema njemu nalazi u odnosu kakve podređenosti ili zavisnosti i time iz nehata izazove samoubistvo ili pokušaj samoubistva te osobe, kaznit će se kaznom zatvora od šest mjeseci do tri godine.“

Član 27.

Član 171. mijenja se i glasi:

„Član 171. (Protupravni prekid trudnoće)

- (1) Ko protivno propisima o prekidu trudnoće trudnoj ženi s njezinim pristankom započne činiti ili učini prekid trudnoće ili je potakne ili joj pomogne učiniti prekid trudnoće, kaznit će se kaznom zatvora od tri mjeseca do tri godine.
- (2) Ko trudnoj ženi bez njezina pristanka započne činiti ili učini prekid trudnoće, kaznit će se kaznom zatvora od jedne do osam godina.
- (3) Ako je krivičnim djelom iz stava (1) ovog člana trudnoj ženi zdravlje teško narušeno ili je prouzrokovana smrt trudne žene ili je djelo učinjeno prema djetetu, učinitelj će se kazniti kaznom zatvora od jedne do deset godina.
- (4) Ako je krivičnim djelom iz stava (2) ovog člana trudnoj ženi zdravlje teško narušeno ili je prouzrokovana smrt trudne žene ili je djelo učinjeno prema djetetu, učinitelj će se kazniti kaznom zatvora od tri do 15 godina.“

Član 28.

Član 172. mijenja se i glasi:

„Član 172. (Teška tjelesna ozljeda)

- (1) Ko drugoga teško tjelesno ozlijedi ili mu zdravlje teško naruši, kaznit će se kaznom zatvora od šest mjeseci do pet godina.
- (2) Ko drugoga tjelesno ozlijedi ili mu zdravlje naruši tako teško da je zbog toga doveden u opasnost život ozljeđenog ili je uništen ili trajno i u znatnoj mjeri oslabljen koji važan dio njegova tijela ili koji važan organ ili je prouzrokovana trajna nesposobnost za rad ozljeđenog ili trajno i teško narušenje njegova zdravlja ili unakaženost, kaznit će se kaznom zatvora od jedne do osam godina.
- (3) Ako ozlijeđeni umre zbog ozljede iz st. (1) i (2) ovog člana, učinitelj će se kazniti kaznom zatvora od dvije do 12 godina.
- (4) Ako je krivično djelo iz st. (1) do (3) ovog člana učinjeno prema djetetu ili trudnoj ženi ili članu porodice ili bliskoj osobi ili prema osobi posebno ranjivoj zbog teže tjelesne ili duševne smetnje ili iz mržnje, kaznit će se za krivično djelo iz stava (1) ovog člana kaznom zatvora od jedne do osam godina, za krivično djelo iz stava (2) ovog člana kaznom zatvora od dvije do deset godina, a za krivično djelo iz stava (3) ovog člana kaznom zatvora od tri do 15 godina.
- (5) Ko krivično djelo iz st. (1) i (2) ovog člana učini iz nehata, kaznit će se kaznom zatvora do tri godine.
- (6) Ko krivično djelo iz st. (1) do (3) ovog člana učini namah, doveden bez svoje krivnje u jaku razdraženost ili prepast napadom, zlostavljanjem ili teškim vrijeđanjem od ozlijeđenog, kaznit će se za krivično djelo iz st. (1) i (2) kaznom zatvora od tri mjeseca do tri godine, a za krivično djelo iz stava (3) kaznom zatvora od šest mjeseci do pet godina.“

Član 29.

U članu 173. stav (2) mijenja se i glasi:

„(2) Ko krivično djelo iz stava (1) ovog člana učini prema članu porodice ili bliskoj osobi ili prema djetetu ili trudnoj ženi ili osobi posebno ranjivoj zbog njezine teže tjelesne ili duševne smetnje ili iz mržnje, kaznit će se kaznom zatvora do tri godine.“

Stav (3) briše se.

Član 30.

Iza člana 173. dodaju se novi čl. 173a. i 173b. koji glase:

„Član 173a.

(Sakaćenje ženskih spolnih organa)

- (1) Ko ženskoj osobi potpuno ili djelimično odstrani, obreže ili na drugi način izvrši sakaćenje vanjskih spolnih organa ili je na to prinudi, potiče ili joj pomogne u tome, kaznit će se kaznom zatvora od jedne do osam godina.
- (2) Ako je djelo iz stava (1) ovog člana učinjeno iz mržnje ili prema djetetu ili prema članu porodice ili bliskoj osobi ili prema osobi posebno ranjivoj zbog teže tjelesne ili duševne smetnje, učinitelj će se kazniti kaznom zatvora od jedne do deset godina.
- (3) Ako je uslijed krivičnog djela iz st. (1) i (2) ovog člana nastupila smrt ženske osobe, učinitelj će se za krivično djelo iz stava (1) ovog člana kazniti kaznom zatvora od tri do 12 godina, a za krivično djelo iz stava (2) kaznom zatvora od tri do 15 godina.

Član 173b.

(Prinudna sterilizacija)

- (1) Ko na drugoj osobi izvrši operaciju u svrhu ili sa posljedicom onemogućavanja prirodne reprodukcije bez informiranog pristanka te osobe i razumijevanja postupka, kaznit će se kaznom zatvora od jedne do osam godina.
- (2) Ako je djelo iz stava (1) ovog člana izvršeno iz mržnje ili prema djetetu ili članu porodice ili bliskoj osobi ili prema osobi posebno ranjivoj zbog teže tjelesne ili duševne smetnje, učinitelj će se kazniti kaznom zatvora od jedne do deset godina.
- (3) Ako je uslijed djela iz stava (1) ovog člana nastupila smrt osobe, učinitelj će se kazniti kaznom zatvora od tri do 15 godina.“

Član 31.

Iza člana 179. dodaje se novi član 179a. koji glasi:

„Član 179a.

(Uhođenje)

- (1) Ko ponovljeno prati ili uhodi drugu osobu ili s njom direktno ili preko treće osobe ili putem informaciono-komunikacijske tehnologije nastoji uspostaviti ili uspostavlja neželjeni kontakt ili je na drugi način zastrašuje i time kod nje izazove tjeskobu ili strah za njezinu sigurnost ili sigurnost njenog člana porodice ili njoj bliske osobe, kaznit će se kaznom zatvora do jedne godine.
- (2) Ako je djelo iz stava (1) ovog člana učinjeno u odnosu na člana porodice ili blisku osobu ili prema djetetu ili prema osobi posebno ranjivoj zbog teže tjelesne ili duševne smetnje ili iz mržnje, učinitelj će se kazniti kaznom zatvora do tri godine.“

Član 32.

U članu 180. stav (2) riječi: „ili maloljetniku“ brišu se.

Član 33.

Iza člana 181. dodaju se novi čl. 181a. i 181b. koji glase:

„Član 181a. (Prinuda)

Ko drugog silom ili ozbiljnom prijetnjom prinudi da nešto učini ili ne učini ili trpi, ako za pojedino krivično djelo nije propisana posebna kazna, kaznit će se kaznom zatvora do tri godine.

Član 181b. (Psihičko nasilje)

- (1) Ko zlostavlja drugog ili prema njemu postupa na način kojim se vrijeđa ljudsko dostojanstvo i time naruši njegov psihički integritet, kaznit će se kaznom zatvora do jedne godine.
- (2) Ako je djelo iz stava (1) ovog člana učinjeno prema djetetu ili prema osobi posebno ranjivoj zbog teže tjelesne ili duševne smetnje ili iz mržnje, ili putem informaciono – komunikacijske tehnologije, učinitelj će se kazniti kaznom zatvora od šest mjeseci do pet godina.“

Član 34.

U članu 183. stav (3) briše se.

Član 35.

U članu 189. stav (3) mijenja se i glasi:

„(3) Predmeti koji su bili namijenjeni ili upotrijebljeni za učinjenje krivičnog djela iz st. (1) i (2) ovog člana i predmeti koji su nastali učinjenjem tih krivičnih djela oduzet će se.“

Stav (4) briše se.

Član 36.

Iza člana 189. dodaje se novi član 189a. koji glasi:

„Član 189a. (Zloupotreba snimke spolno eksplicitnog sadržaja)

- (1) Ko zloupotrijebi odnos povjerenja i bez pristanka snimane osobe učini dostupnim trećoj osobi snimku spolno eksplicitnog sadržaja koja je snimljena uz pristanak te osobe za osobnu upotrebu i na taj način povrijedi privatnost te osobe, kaznit će se kaznom zatvora do tri godine.
- (2) Kaznom iz stava (1) ovog člana kaznit će se ko upotrebom računalnog sistema ili na drugi način izradi novu ili preinači postojeću snimku spolno eksplicitnog sadržaja i tu snimku upotrijebi kao pravu te time povrijedi privatnost osobe na toj snimci.
- (3) Ko krivično djelo iz st. (1) i (2) ovog člana učini putem računalnog sistema ili mreže ili na drugi način zbog čega je snimka postala dostupna većem broju osoba, kaznit će se kaznom zatvora od šest mjeseci do pet godina.
- (4) Snimke i posebne naprave kojima je učinjeno krivično djelo iz ovog člana će se oduzeti.“

Član 37.

Član 193. mijenja se i glasi:

„Član 193. (Nedozvoljeno korištenje osobnih podataka)

- (1) Ko protivno uvjetima određenim u zakonu prikuplja, obrađuje ili koristi osobne podatke fizičkih osoba, kaznit će se kaznom zatvora do jedne godine.
- (2) Ako krivično djelo iz stava (1) ovog člana učini službena ili odgovorna osoba u vršenju službe ili javnih ovlaštenja kaznit će se kaznom zatvora do tri godine.“

Član 38.

Iza člana 193. dodaje se novi član 193a. koji glasi:

„Član 193a. (Neovlašćeno objavljivanje i prikazivanje spisa, portreta i snimka)

- (1) Ko, neposredno ili putem informaciono-komunikacionih tehnologija, objavi ili prikaže spis, portret, fotografiju, film, fonogram ili drugi sadržaj osobnog karaktera bez pristanka osobe koja je spis sastavila ili na koju se spis odnosi, koja je prikazana na portretu, fotografiji, filmu ili čiji je glas snimljen na fonografu ili bez pristanka osobe čiji se pristanak po zakonu traži, kaznit će se novčanom kaznom ili kaznom zatvora do tri godine.

(2) Ako krivično djelo iz stava (1) ovog člana učini službena ili odgovorna osoba u vršenju službe ili javnih ovlašćenja, kaznit će se kaznom zatvora od šest mjeseci do pet godina.“

Član 39.

Član 203. mijenja se i glasi:

„Član 203. (Silovanje)

(1) Ko s drugom osobom bez njezina pristanka izvrši spolni odnošaj ili s njim izjednačenu spolnu radnju ili navede drugu osobu da bez svog pristanka s trećom osobom izvrši spolni odnošaj ili s njim izjednačenu spolnu radnju ili da bez svog pristanka nad samom sobom izvrši sa spolnim odnošajem izjednačenu spolnu radnju, kaznit će se kaznom zatvora od jedne do pet godina.

(2) Učinitelj koji je bio u otklonjivoj zabludi u pogledu postojanja pristanka iz stava (1) ovog člana, kaznit će se kaznom zatvora do tri godine.

(3) Ko drugu osobu upotrebom sile ili prijetnje da će izravno napasti na njezin život ili tijelo ili na život ili tijelo njoj bliske osobe prisili na spolni odnošaj ili s njim izjednačenu spolnu radnju, na spolni odnošaj ili s njim izjednačenu spolnu radnju s trećom osobom ili da nad samom sobom izvrši spolni odnošaj ili s njom izjednačenu spolnu radnju, kaznit će se kaznom zatvora od jedne do deset godina.

(4) Ko krivično djelo iz stava (1) ovog člana učini prema članu porodice ili bliskoj osobi ili prema osobi posebno ranjivoj zbog bolesti, zavisnosti, trudnoće, invaliditeta, teže tjelesne ili duševne smetnje ili prema djetetu starijem od 15 godina ili na osobito okrutan ili osobito ponižavajući način ili iz mržnje ili zajedno s jednim ili više učinitelja pri čemu je prema istoj osobi izvršeno više spolnih odnošaja ili s njim izjednačenih spolnih radnji ili uz upotrebu oružja ili opasnog oruđa ili ako je silovana osoba teško tjelesno ozlijeđena ili je ostala trudna, kaznit će se kaznom zatvora od tri do 12 godina.

(5) Ko krivično djelo iz stava (3) ovog člana učini pod okolnostima iz stava (4) ovog člana, kaznit će se kaznom zatvora od pet do 15 godina.

(6) Ako je krivičnim djelom iz st. (1) i (3) ovog člana prouzrokovana smrt osobe, učinitelj će se kazniti kaznom zatvora najmanje pet godina.

(7) Pristanak iz stava (1) ovog člana postoji ako je osoba svojom voljom odlučila stupiti u spolni odnošaj ili s njime izjednačenu spolnu radnju i bila je sposobna donijeti i izraziti takvu odluku. Smatra se da takvog pristanka nema osobito ako je spolni odnošaj ili s njime izjednačena spolna radnja izvršena uz upotrebu prijetnje, prijevare, zloupotrebe položaja prema osobi koja se prema učinitelju nalazi u odnosu zavisnosti, iskorištavanja stanja osobe zbog kojeg ona nije bila sposobna izraziti svoje odbijanje ili nad osobom kojoj je protupravno oduzeta sloboda.“

Član 40.

Iza člana 203. dodaje se novi član 203a. koji glasi:

„Član 203a. (Spolno uznemiravanje)

(1) Spolno uznemiravanje je svako verbalno, neverbalno ili tjelesno neželjeno ponašanje spolne prirode koje ima za cilj ili stvarno predstavlja povredu dostojanstva osobe, koje uzrokuje strah, neprijateljsko, ponižavajuće ili uvredljivo okruženje.

(2) Ko spolno uznemirava drugu osobu, kaznit će se kaznom zatvora do jedne godine.

(3) Ko djelo iz stava (2) ovog člana učini prema osobi koja se prema njemu nalazi u odnosu podređenosti ili zavisnosti ili koja je posebno ranjiva zbog uzrasta, bolesti, invaliditeta, trudnoće, teže tjelesne ili duševne smetnje, članu porodice, bliskoj osobi ili iz mržnje, ili putem informaciono – komunikacijskih tehnologija, kaznit će se kaznom zatvora od tri mjeseca do tri godine.

Član 41.

Čl. 204, 205, 206. i 207. brišu se.

Član 42.

Član 208. mijenja se i glasi:

„Član 208. (Bludne radnje)

(1) Ko u slučajevima iz člana 203. (Silovanje) ovog zakona, kada nije učinjen ni pokušaj tog krivičnog djela, učini samo bludnu radnju, kaznit će se kaznom zatvora od tri mjeseca do tri godine.

(2) Ko djelo iz stava (1) ovog člana učini prema djetetu starijem od 15 godina ili ako djelo iz stava (1) ovog člana učini srodnik po krvi u pravoj liniji do bilo kojeg stepena, u pobočnoj liniji zaključno s četvrtim stepenom, očuh, maćeha, usvojitelj, staratelj, nastavnik, vaspitač, ljekar, vjerski službenik ili druga osoba kojoj je dijete povjereno radi učenja, vaspitanja, čuvanja, staranja ili njege, učinitelj će se kazniti kaznom zatvora od jedne godine do pet godina.“

Član 43.

Član 209. briše se.

Član 44.

Iza člana 210b. dodaje se nova glava XIXa. i novi čl. 210c, 210d, 210e, 210f, 210g, 210h, 210i. i 210j., koji glase:

„XIXa. – GLAVA DEVETNAEST A - KRIVIČNA DJELA SPOLNOG ZLOSTAVLJANJA I ISKORIŠTAVANJA DJETETA

Član 210c.

(Spolni odnošaj s djetetom mlađim od 15 godina)

(1) Ko izvrši spolni odnošaj ili s njim izjednačenu spolnu radnju s djetetom mlađim od 15 godina ili ga navede da izvrši spolni odnošaj ili s njim izjednačenu spolnu radnju s trećom osobom ili da nad samim sobom izvrši sa spolnim odnošajem izjednačenu spolnu radnju, kaznit će se kaznom zatvora od jedne do deset godina.

(2) Ako djelo iz stava (1) ovog člana učini srodnik po krvi u pravoj liniji do bilo kojeg stepena, u pobočnoj liniji zaključno s četvrtim stepenom, očuh, maćeha, usvojitelj, staratelj, nastavnik, vaspitač, ljekar, vjerski službenik ili druga osoba kojoj je dijete povjereno radi učenja, vaspitanja, čuvanja, staranja ili njege, učinitelj će se kazniti kaznom zatvora od tri do 12 godina.

(3) Ako je djelo iz stava (1) ovog člana učinjeno upotrebom sile ili prijetnje ili iskorištavanjem duševne poremećenosti ili nemoćnog stanja djeteta ili na naročito svirep ili ponižavajući način ili od strane više osoba ili je uslijed djela nastupila teška tjelesna povreda, teško narušavanje zdravlja ili trudnoća osobe prema kojoj je djelo učinjeno, učinitelj će se kazniti kaznom zatvora najmanje tri godine.

(4) Ako je djelo iz stava (2) ovog člana učinjeno upotrebom sile ili prijetnje ili iskorištavanjem duševne poremećenosti ili nemoćnog stanja djeteta ili na naročito svirep ili ponižavajući način ili od strane više osoba ili je uslijed djela nastupila teška tjelesna povreda, teško narušavanje zdravlja ili trudnoća osobe prema kojoj je djelo učinjeno, učinitelj će se kazniti kaznom zatvora najmanje pet godina.

(5) Ako je uslijed djela iz st. (1) do (4) ovog člana nastupila smrt djeteta, učinitelj će se kazniti kaznom zatvora najmanje deset godina.

(6) Ko nad djetetom mlađim od 15 godina izvrši bludnu radnju ili ga navede da izvrši bludnu radnju s drugom osobom ili da nad samim sobom izvrši bludnu radnju, kaznit će se kaznom zatvora od šest mjeseci do pet godina.

(7) Ko pod uvjetima iz st. (2) do (4) ovog člana nad djetetom mlađim od 15 godina izvrši bludnu radnju, kaznit će se kaznom zatvora od jedne do osam godina.

(8) Učinitelj koji je bio u otklonjivoj zabludi u odnosu na životnu dob djeteta iz stava (1) ovog člana, kaznit će se kaznom zatvora od jedne do pet godina, a ako je bio u otklonjivoj zabludi u odnosu na životnu dob djeteta iz stava (6), kaznit će se kaznom zatvora od šest mjeseci do tri godine.

(9) Neće se kazniti učinitelj za djelo iz st. (1) i (6) ovog člana ako razlika u dobi između osoba koje vrše spolni odnošaj ili s njim izjednačenu spolnu radnju nije veća od tri godine.

Član 210d.

(Spolna zloupotreba djeteta starijeg od 15 godina)

(1) Srodnik po krvi u pravoj liniji do bilo kojeg stepena, u pobočnoj liniji zaključno s četvrtim stepenom, očuh, maćeha, usvojitelj, staratelj, nastavnik, vaspitač, ljekar, vjerski službenik ili druga osoba koja izvrši obljubu ili s njom izjednačenu spolnu radnju s djetetom koje je navršilo 15 godina koje mu je povjereno na čuvanje, učenje, vaspitanje, staranje ili njegu ili ga navede da izvrši spolni odnošaj ili s njim izjednačenu spolnu radnju s trećom osobom ili da nad samim sobom izvrši sa spolnim odnošajem izjednačenu spolnu radnju, kaznit će se kaznom zatvora od jedne do deset godina.

(2) Kaznom iz stava (1) ovog člana kaznit će se i ko izvrši obljubu ili s njom izjednačenu spolnu radnju s djetetom starijim od 15 godina, iskoristivši njegovu psihičku nezrelost ili lakomislenost ili stanje nemoći ili ga navede da izvrši spolni odnošaj ili s njim izjednačenu spolnu radnju s trećom osobom ili da nad samim sobom izvrši sa spolnim odnošajem izjednačenu spolnu radnju.

(3) Ko pod uvjetima iz st. (1) i (2) izvrši bludnu radnju, kaznit će se kaznom zatvora od šest mjeseci do pet godina.

Član 210e.

(Mamljenje djece za zadovoljenje spolnih potreba)

(1) Punoljetna osoba koja osobi mlađoj od 15 godina, koristeći kompjutersku mrežu ili drugu informaciono-komunikacionu tehnologiju, dogovori sastanak radi vršenja obljube ili s njom izjednačene spolne radnje ili radi proizvodnje pornografskog materijala ili radi drugih oblika spolnog iskorištavanja i koja preduzme radnje da do tog sastanka dođe, kaznit će se kaznom zatvora do tri godine.

(2) Ko prikuplja, daje ili prenosi podatke o osobi mlađoj od 15 godina radi učinjenja krivičnog djela iz stava (1) ovog člana, kaznit će se kaznom zatvora do jedne godine.

Član 210f.

(Zadovoljenje pohote pred djetetom)

(1) Ko pred djetetom mlađim od 15 godina čini radnje namijenjene zadovoljavanju vlastite ili tuđe pohote ili ko navede dijete mlađe od 15 godina da pred njim ili s drugom osobom čini takve radnje, kaznit će se kaznom zatvora od šest mjeseci do tri godine.

(2) Ko pod okolnostima iz člana 210d. st. (1) i (2) pred djetetom starijim od 15 godina čini radnje namijenjene zadovoljavanju vlastite ili tuđe pohote ili ko navede dijete starije od 15 godina da pred njim ili pred drugom osobom čini takve radnje, kaznit će se kaznom zatvora od tri mjeseca do tri godine.

Član 210g.
(Navođenje djeteta na prostituciju)

- (1) Ko radi zarade ili druge koristi dijete navodi, podstiče ili namamljuje na pružanje seksualnih usluga ili na drugi način omogući njegovu predaju drugome radi pružanja seksualnih usluga ili na bilo koji način učestvuje u organiziranju ili vođenju pružanja seksualnih usluga, a znao je ili je bio dužan i mogao znati da se radi o djetetu, kaznit će se kaznom zatvora od jedne do osam godina.
- (2) Ko koristi seksualne usluge djeteta koje je navršilo 15 godina uz davanje bilo kakve naknade ili protuusluge, a znao je ili je bio dužan i mogao znati da se radi o djetetu, kaznit će se kaznom zatvora od šest mjeseci do pet godina.
- (3) Ko djelo iz stava (1) ovog člana izvrši prema više osoba, kaznit će se kaznom zatvora od jedne do deset godina.
- (4) Ko osobu za koju je znao ili bio dužan i mogao znati da je dijete, radi zarade silom ili prijetnjom, obmanom, prijevarom, zloupotrebom ovlašćenja ili teškog položaja ili odnosa zavisnosti, prisili ili navede na pružanje seksualnih usluga ili ko koristi seksualne usluge tog djeteta uz naplatu, a znao je ili je morao i mogao znati za navedene okolnosti, kaznit će se kaznom zatvora od tri do 15 godina.
- (5) Ko oglašava pružanje seksualnih usluga djeteta, kaznit će se kaznom zatvora od šest mjeseci do pet godina.
- (6) Nije od značaja za postojanje djela da li se osoba koja se navodi, podstiče ili namamljuje već ranije bavila prostitucijom.

Član 210h.
(Iskorištavanje djeteta radi pornografije)

- (1) Ko navodi dijete na učestvovanje u snimanju dječje pornografije ili ko organizira ili omogući snimanje dječje pornografije, kaznit će se kaznom zatvora od šest mjeseci do pet godina.
- (2) Ko snimi, proizvede, nudi, čini dostupnim, distribuira, širi, uvozi, izvozi, pribavlja za sebe ili za drugoga, prodaje, daje, prikazuje ili posjeduje dječju pornografiju ili joj svjesno pristupa putem informacijsko - komunikacijskih tehnologija, kaznit će se kaznom zatvora od jedne do osam godina.
- (3) Ko upotrebom sile, prijetnjom, obmanom, prijevarom, zloupotrebom položaja ili teških prilika djeteta ili odnosa zavisnosti, prisili ili navede dijete na snimanje dječje pornografije, kaznit će se kaznom zatvora od jedne do deset godina.
- (4) Predmeti, uređaji, sredstva, računalni programi i podaci namijenjeni ili upotrijebljeni za učinjenje krivičnog djela iz st. (1) do (3) ovog člana ili koji su nastali učinjenjem tih krivičnih djela će se oduzeti.
- (5) Dijete se neće kazniti za proizvodnju i posjedovanje pornografskog materijala koji prikazuje njega osobno ili njega i drugo dijete ako su oni sami taj materijal proizveli i posjeduju ga uz pristanak svakog od njih i isključivo za njihovu osobnu upotrebu.
- (6) Dječja pornografija u smislu ovog člana je materijal koji vizuelno ili na drugi način prikazuje dijete ili realno prikazano nepostojeće dijete ili osobu koja izgleda kao dijete

u pravom ili simuliranom spolno eksplicitnom ponašanju ili koji prikazuje spolne organe djece u seksualne svrhe.

(7) Materijali koji imaju umjetnički, medicinski ili naučni značaj ne smatraju se pornografijom u smislu ovog člana.

Član 210i.

(Iskorištavanje djeteta za pornografske predstave)

(1) Ko navodi dijete na učestvovanje u pornografskim predstavama, kaznit će se kaznom zatvora od šest mjeseci do pet godina.

(2) Ko upotrebom sile, prijetnjom, obmanom, prijevarom, zloupotrebom položaja ili teških prilika djeteta ili odnosa zavisnosti, prisili ili navede dijete da učestvuje u pornografskoj predstavi, kaznit će se kaznom zatvora od jedne do deset godina.

(3) Ko zarađuje od pornografskih predstava u kojima učestvuje dijete ili na drugi način iskorištava dijete za pornografske predstave, kaznit će se kaznom zatvora od jedne do 12 godina.

(4) Kaznom zatvora iz stava (1) ovog člana kaznit će se ko posjećuje pornografsku predstavu ako je znao ili je morao i mogao znati da u njoj učestvuje dijete.

(5) Predmeti, uređaji, sredstva, računalni programi i podaci namijenjeni ili upotrebljeni za učinjenje krivičnog djela iz st. (1) do (4) ovog člana ili koji su nastali učinjenjem tih krivičnih djela će se oduzeti.

(6) Pornografska predstava u smislu ovog člana je prikazivanje uživo ili putem informaciono-komunikacionih tehnologija pravog djeteta ili realno prikazanog nepostojećeg djeteta ili osobe koja izgleda kao dijete u pravom ili simuliranom spolno eksplicitnom ponašanju ili spolnih organa pravog djeteta, realno prikazanog nepostojećeg djeteta ili osobe koja izgleda kao dijete u seksualne svrhe.

Član 210j.

(Upoznavanje djeteta s pornografijom)

(1) Ko djetetu mlađem od 15 godina proda, pokloni, prikaže ili javnim izlaganjem posredstvom računalnog sistema, mreže ili medija za pohranu računalnih podataka ili drugih vidova komunikacije ili na drugi način učini dostupnim spise, slike, audio-vizuelni materijal ili druge predmete pornografske sadržine ili mu prikaže pornografsku predstavu, kaznit će se kaznom zatvora od šest mjeseci do tri godine.

(2) Predmeti, uređaji, sredstva, računalni programi i podaci namijenjeni ili upotrebljeni za učinjenje krivičnog djela iz stava (1) ovog člana ili koji su nastali učinjenjem krivičnog djela će se oduzeti.

(3) Pornografijom u smislu ovog člana se smatra materijal koji vizuelno ili na drugi način prikazuje osobu u pravom ili simuliranom spolno eksplicitnom ponašanju ili koji prikazuje spolne organe ljudi u seksualne svrhe.

(4) Materijali koji imaju umjetnički, medicinski ili naučni značaj ne smatraju se pornografijom u smislu ovoga člana.“

Član 45.

Čl. 211, 212. i 213. brišu se.

Član 46.

Iza člana 215. dodaje se novi član 215a. koji glasi:

„Član 215a. (Prinudno sklapanje braka)

- (1) Ko upotrebom sile ili prijetnjom prisili drugu osobu da zaključi brak, kaznit će se kaznom zatvora od šest mjeseci do pet godina.
- (2) Ko radi učinjenja djela iz stava (1) ovog člana drugu osobu potiče da ode u inostranstvo, kaznit će se kaznom zatvora do tri godine.
- (3) Ako je djelo iz st. (1) i (2) ovog člana učinjeno prema djetetu, učinitelj će se kazniti kaznom zatvora od jedne do osam godina.“

Član 47.

Član 216. mijenja se i glasi:

„Član 216. (Izvanbračna zajednica s djetetom koje nije navršilo 16 godina)

- (1) Punoljetna osoba koja izvanbračno živi s djetetom koje nije navršilo 16 godina života, kaznit će se kaznom zatvora od tri mjeseca do tri godine.
- (2) Kaznom iz stava (1) ovog člana kaznit će se ko djetetu koje nije navršilo 16 godina života omogućiti izvanbračni život s drugom osobom ili ga na to navede, a time ne čini neko drugo krivično djelo za koje je propisana teža kazna.
- (3) Ko krivično djelo iz stava (2) ovog člana učini iz koristoljublja, kaznit će se kaznom zatvora od šest mjeseci do pet godina.“

Član 48.

Član 217. mijenja se i glasi:

„Član 217. (Oduzimanje djeteta)

- (1) Ko dijete protupravno oduzme roditelju, usvojitelju, staratelju ili ustanovi kojoj je povjereno ili ko ga protupravno zadržava ili sprečava da bude s osobom koja ima to pravo ili ko onemogućiti izvršenje izvršne odluke o staranju prema djetetu, kaznit će se kaznom zatvora do tri godine.
- (2) Ako je krivičnim djelom iz stava (1) ovog člana dijete napustilo teritoriju Bosne i Hercegovine, učinitelj će se kazniti kaznom zatvora od tri mjeseca do pet godina.
- (3) Učinitelj koji dobrovoljno preda dijete, može se osloboditi kazne.“

Član 49.

U članu 218. riječi: „tri mjeseca do tri godine“ zamjenjuju se riječima: „šest mjeseci do pet godina“.

Član 50.

Član 219. mijenja se i glasi:

„Član 219.
(Zapuštanje ili zlostavljanje djeteta)

- (1) Roditelj, usvojitelj, staratelj ili druga osoba koja grubo zanemaruje svoje funkcije zbrinjavanja ili odgoja djeteta, kaznit će se kaznom zatvora od tri mjeseca do tri godine.
- (2) Kaznom iz stava (1) ovog člana kaznit će se roditelj, usvojitelj, staratelj ili druga osoba koja zlostavi dijete, prisili ga na rad koji ne odgovara njegovoj životnoj dobi, ili na pretjerani rad, ili na prosjačenje, ili ga iz koristoljublja navodi na ponašanje koje je štetno za njegov razvoj.
- (3) Ako je krivičnim djelom iz st. (1) i (2) ovog člana dijete teško tjelesno ozlijeđeno ili mu je teško narušeno zdravlje ili se zbog krivičnog djela iz st. (1) ili (2) ovog člana dijete odalo prosjačenju, prostituciji ili drugim oblicima asocijalnog ponašanja ili delikvenciji, učinitelj će se kazniti kaznom zatvora od tri mjeseca do pet godina.“

Član 51.

Iza člana 219. dodaje se novi član 219a. koji glasi:

„Član 219a.
(Povreda privatnosti djeteta)

- (1) Ko iznese ili prenese nešto iz osobnog ili porodičnog života djeteta ili suprotno propisima objavi djetetovu fotografiju ili otkrije identitet djeteta i time kod djeteta stvori stanje uznemirenosti ili ga izloži poruzi vršnjaka ili drugih osoba ili na neki drugi način ugrozi dobrobit djeteta, kaznit će se novčanom kaznom ili kaznom zatvora do jedne godine.
- (2) Ko djelo iz stava (1) ovog člana izvrši putem informaciono – komunikacijske tehnologije, na javnom skupu ili na drugi način, zbog čega je ono postalo pristupačno većem broju osoba, kaznit će se novčanom kaznom ili kaznom zatvora do tri godine.
- (3) Ko djelo iz st. (1) i (2) ovog člana učini kao službena osoba ili u obavljanju profesionalne djelatnosti, kaznit će se novčanom kaznom ili kaznom zatvora do tri godine.“

Član 52.

U članu 220. riječi: „tri godine“ zamjenjuju se riječima: „pet godina“.

Član 53.

Član 222. mijenja se i glasi:

„Član 222. (Nasilje u porodici)

- (1) Ko fizičkim, seksualnim, psihičkim ili ekonomskim nasiljem ugrožava mir, tjelesnu, seksualnu, psihičku ili ekonomsku cjelovitost člana svoje porodice ili domaćinstva ili bliske osobe, nezavisno od toga da li učinitelj dijeli ili je dijelio domaćinstvo sa žrtvom, kaznit će se sa kaznom zatvora do tri godine.
- (2) Ako je pri učinjenju krivičnog djela iz stava (1) ovog člana upotrijebljeno oružje, opasno oruđe ili drugo sredstvo prikladno teško ozlijediti tijelo ili narušiti zdravlje, učinitelj će se kazniti kaznom zatvora od tri mjeseca do tri godine.
- (3) Ako je krivičnim djelom iz st. (1) i (2) ovog člana, član porodice ili domaćinstva ili bliska osoba teško tjelesno ozlijeđena ili joj je zdravlje teško narušeno ili ako je krivično djelo iz st. (1) i (2) ovog člana učinjeno prema djetetu, učinitelj će se kazniti kaznom zatvora od jedne do pet godina.
- (4) Ako je krivičnim djelom iz st. (1) do (3) ovog člana prouzrokovana smrt člana porodice ili domaćinstva ili bliske osobe, učinitelj će se kazniti kaznom zatvora od tri do 15 godina.“

Član 54.

Iza člana 222. dodaje se novi član 222a. koji glasi:

„Član 222a. (Rodoskrvnuće)

- (1) Ko izvrši spolni odnošaj ili s njim izjednačenu spolnu radnju s krvnim srodnikom u pravoj liniji ili s bratom ili sestrom, kaznit će se novčanom kaznom ili kaznom zatvora od tri mjeseca do tri godine.
- (2) Ko djelo iz stava (1) ovog člana učini s djetetom, kaznit će se kaznom zatvora od jedne do deset godina.“

Član 55.

U članu 224. riječ „maloljetnika“ zamjenjuju se riječju „djeteta“.

Član 56.

U članu 231. stav (5) riječi: „umrle maloljetne“ zamjenjuju se riječima: „umrlog djeteta ili umrle“.

Član 57.

Član 237. mijenja se i glasi:

„Član 237.
(Služenje alkoholnih pića djetetu)

Ko u ugostiteljskom objektu ili drugom objektu u kojem se prodaju alkoholna pića posluži djetetu žestoko alkoholno piće ili ga posluži drugim alkoholnim pićem u količinama koje mogu izazvati pijanstvo djeteta, kaznit će se novčanom kaznom ili kaznom zatvora do šest mjeseci.“

Član 58.

U članu 239. stav (2) riječ „maloljetniku“ briše se.

Član 59.

U članu 345. stav (4) riječi: „ili maloljetniku“ brišu se.

Član 60.

Iza člana 353. dodaje se novi član 353a. koji glasi:

„Član 353a.
(Kršenje zabrane utvrđene sigurnosnom mjerom)

Ko prekrši zabranu utvrđenu sigurnosnom mjerom izrečenom pravosnažnom sudskom odlukom, kaznit će se novčanom kaznom ili kaznom zatvora do tri godine.“

Član 61.

Iza člana 359a. dodaje se novi član 359b. koji glasi:

„359b.
(Prisila prema zdravstvenom radniku)

(1) Ko doktora medicine, doktora stomatologije ili drugog zdravstvenog radnika koji zdravstvenu djelatnost obavlja kao javnu službu silom ili prijetnjom da će izravno upotrijebiti silu spriječi u obavljanju njegove zdravstvene djelatnosti ili ga prisili na izvršenje postupka ili intervencije koji nisu u skladu s pravilima medicinske struke ili etike, kaznit će se kaznom zatvora do tri godine.

(2) Ako je krivičnim djelom iz stava (1) ovog člana doveden u opasnost život ili tijelo doktora medicine, doktora stomatologije ili drugog zdravstvenog radnika ili mu je nanesena tjelesna ozljeda ili je upotrijebljeno oružje ili opasno oruđe, učinitelj će se kazniti kaznom zatvora od šest mjeseci do pet godina.

(3) Ako je učinitelj krivičnog djela iz st. (1) i (2) ovog člana bio izazvan protuzakonitim ili grubim ponašanjem doktora medicine, doktora stomatologije ili drugog zdravstvenog radnika može se osloboditi od kazne.“

Član 62.

(Prečišćeni tekst Krivičnog zakona Federacije Bosne i Hercegovine)

Ovlašćuju se Zakonodavno – pravna komisija Predstavničkog doma i Zakonodavno – pravna komisija Doma naroda Parlamenta Federacije Bosne i Hercegovine da utvrde Prečišćeni tekst Krivičnog zakona Federacije Bosne i Hercegovine u roku od šest mjeseci od dana stupanja na snagu ovog zakona.

Član 63.

Ovaj zakon stupa na snagu osmog dana od dana objavljivanja u „Službenim novinama Federacije BiH“.

O B R A Z L O Ž E N J E
PRIJEDLOGA ZAKONA O IZMJENAMA I DOPUNAMA KRIVIČNOG ZAKONA
FEDERACIJE BOSNE I HERCEGOVINE

I. – USTAVNI OSNOV

Ustavnopravni osnov za donošenje ovog zakona sadržan je u odredbama člana IV. A. 20. (1) d) Ustava Federacije Bosne i Hercegovine. Naime, prema odredbama člana IV. A. 20. (1) d) Ustava Federacije BiH, Parlament Federacije BiH nadležan je za donošenje zakona o vršenju funkcije federalne vlasti, iz čega proizilazi da navedena odredba predstavlja ustavnopravni osnov za njegovo donošenje.

II. – RAZLOZI ZA DONOŠENJE ZAKONA

Konvencija Vijeća Evrope o prevenciji i borbi protiv nasilja prema ženama i nasilja u porodici ("Službeni glasnik BiH – Međunarodni ugovori", broj 19/13) je usvojena 11. maja 2011. godine u Istanbulu, Republika Turska. Naime, nakon niza preporuka Vijeća Evrope o zabrani diskriminacije na osnovu spola i zaštiti od nasilja koje su imale za cilj postavljanja zajedničkih ciljeva i minimuma zajedničkih standarda za države članice, ali nisu imale pravno obavezujući efekt, Konvencija predstavlja prvi pravno obavezujući akt Vijeća Evrope u oblasti sprečavanja i borbe protiv nasilja nad ženama. Ovaj akt ne mora biti izravno primjenjiv u državama potpisnicama, ali zahtijeva posebno prilagođavanje zakonskih i institucionalnih okvira država potpisnica radi njene uspješne implementacije. Bosna i Hercegovina je 07. novembra 2013. godine postala 6. zemlja članica Vijeća Evrope koja je ratificirala Konvenciju, čime se obavezala na preduzimanje zakonodavnih i drugih mjera radi osiguranja pravnog, institucionalnog i organizacijskog okvira za prevenciju nasilja prema ženama, zaštitu žrtava nasilja te kažnjavanje učinitelja nasilja.

Konvenciju Vijeća Evrope o zaštiti djece od seksualnog iskorištavanja i seksualne zloupotrebe je usvojena dana 25.10.2007. godine u Lanzarotu, Kraljevina Španjolska. Konvencija je u Bosni i Hercegovini stupila na snagu 01.03.2013. godine. Svrha ove Konvencije je spriječiti i suzbijati seksualno iskorištavanje i seksualnu zloupotrebu djece, zaštititi prava djece žrtava seksualnog iskorištavanja i seksualne zloupotrebe i unaprijediti nacionalnu i međunarodnu saradnju protiv seksualnog iskorištavanja i zloupotrebe djece. Seksualno iskorištavanje i seksualno zlostavljanje su među najtežim oblicima nasilja nad djecom. Procijenjeno je da je jedno od pet djece žrtva nekog oblika seksualnog nasilja u Evropi i u oko 80% slučajeva zlostavljač je neko koga dijete dobro zna. Seksualno nasilje nad djecom može se javiti u različitim oblicima; seksualno zlostavljanje u porodici ili u krugu onih kojima dijete vjeruje, seksualno zlostavljanje kroz prostituciju ili sadržaje koji prikazuju seksualno zlostavljanje, seksualno zlostavljanje potpomognuto internetom, ili seksualni napadi vršnjaka. Konvencija predstavlja veliki iskorak kada je u pitanju prevencija seksualnog nasilja nad djecom. Nadograđujući se na postojeće međunarodne i regionalne pravne standarde, Konvencija ih proširuje kako bi se obuhvatila i kriminalizirala sva seksualna krivična djela izvršena nad djecom, bez obzira da li se ta djela vrše radi zarade ili ne.

Evropski Parlament i Vijeće Evropske unije, uzimajući u obzir prijedlog Evropske komisije, dana 14. maja 2024. godine, usvojili su Direktivu (EU) 2024/1385 Evropskog parlamenta i Vijeća od 14. maja 2024. godine o suzbijanju nasilja prema ženama i nasilja u porodici (SL L2024/1385).

Obzirom da nakon ratifikacije Konvencija Vijeća Evrope o prevenciji i borbi protiv nasilja prema ženama i nasilja u porodici i Konvenciju Vijeća Evrope o zaštiti djece od seksualnog iskorištavanja i seksualne zloupotrebe, predmetne konvencije nisu bile inkorporirane u krivično zakonodavstvo Federacije Bosne i Hercegovine, cijeneći činjenicu da je u međuvremenu usvojena i Direktiva (EU) 2024/1385 Evropskog parlamenta i Vijeća od 14. maja 2024. godine o suzbijanju nasilja prema ženama i nasilja u porodici (SL L2024/1385), pristupilo se izradi sveobuhvatnih izmjena i dopuna Krivičnog zakona Federacije Bosne i Hercegovine s ciljem unapređenja zaštite djece, žena i porodice kao jezgre društva, te radi usklađivanja krivičnog zakonodavstva s evropskom pravnom stečevinom.

Dana 27.04.2022. godine, na 32. redovnoj sjednici Predstavničkog doma Parlamenta Federacije Bosne i Hercegovine, usvojen je Nacrt zakona o izmjenama i dopunama Krivičnog zakona Federacije Bosne i Hercegovine. Dana 21.07.2022. godine, na nastavku 19. sjednice, Dom naroda Parlamenta Federacije Bosne i Hercegovine usvojio je Nacrt zakona o izmjenama i dopunama Krivičnog zakona Federacije Bosne i Hercegovine. U skladu sa navedenim, federalni ministar pravde organizirao je i proveo javnu raspravu.

Prilikom izrade ovog zakona, obrađivač je imao u vidu zaključak Parlamenta Federacije Bosne i Hercegovine, te Vlade Federacije Bosne i Hercegovine kojim je naloženo da se prilikom izrade ovog zakona pooštri kaznena politika u krivičnom zakonodavstvu Federacije Bosne i Hercegovine.

U procesu javne rasprave pristigao je veliki broj komentara i sugestija za izmjenu Krivičnog zakona Federacije Bosne i Hercegovine koje je razmatrala ekspertna radna grupa. Velik doprinos u izradi Zakona dala je dr.sc. Ljilja Filipović, predsjednica Krivičnog odjeljenja Vrhovnog suda Federacije Bosne i Hercegovine.

„Ja bih u EU“, udruženje Dignitet i organizacija „Glas žene“ Bihać koje finansira Evropska unija dostavili su prijedlog za izmjenu Krivičnog zakona Federacije BiH na način da se izvrši kriminalizacija femicida. Ekspertna radna grupa je odbila ovaj prijedlog smatrajući da važeći član 166. Krivičnog zakona Federacije BiH pruža dovoljnu zaštitu za procesuiranje krivičnog djela ubistva žene, obzirom da se isto kvalificira kao ubistvo iz mržnje što daje sudovima u Federaciji BiH mogućnost za izricanje većih kazni. Problem u predloženoj inkriminaciji femicida kao posebnog djela leži u otežanoj mogućnosti dokazivanja, obzirom da bi u tom slučaju nadležni tužilac trebao dokazati da je učinitelj femicida izvršio ubistvo žene samo zato što je žena.

U svakom slučaju, za uvođenje posebnog krivičnog djela femicida potrebno je provesti sveobuhvatnu raspravu u koju bi bila uključena šira društvena zajednica.

Komentar je dostavila i ekspertica dr. Dubravka Šimonović, konsultantica koju je angažirao UN Women, koja smatra da je tekst Zakona usklađen sa odredbama Istanbulske konvencije, Lanzarot konvencije, te da je isti uvažio preporuke Grevio-a i EU Women. Prethodno, konsultantica je dostavila nekoliko detaljno urađenih analiza

s prijedlozima za unapređenje Nacrta zakona i održala nekoliko radno – konsultativnih sastanaka s članovima ekspertne radne grupe.

Poslanica u Predstavničkom domu Parlamenta Federacije BiH Lana Prlić u saradnji sa UNFPA (United Nations Population Fund) dostavila je komentare na Nacrt zakona o izmjenama i dopunama Krivičnog zakona Federacije i predložila da se dodaju nove inkriminacije i novo krivično djelo neovlašteno objavljivanje i prikazivanje tuđeg spisa, portreta i snimka, što je uz manje modifikacije i uvaženo uz napomenu da je i u dijelu Zakona kojim se definiraju pojmovi uvedeno i novi pojam informaciono-komunikacijske tehnologije. Poslanica Lana Prlić prethodno je dostavila i sugestije od 17.05.2022. godine, u kojim predlaže da se kazna zatvora izrečena za krivično djelo spolne slobode i morala kao i krivično djelo protiv braka, porodice i mladeži, koja su učinjena na štetu djeteta, ne mogu zamijeniti novčanom kaznom, što je uz korekcije i dodatno preciziranje i prihvaćeno.

Preporuke je dostavio i Gender centar Federacije BiH koje su detaljno razmatrane i većim dijelom usvojene a posebno u dijelu sankcija koje su propisane, na način da budu djelotvorne, proporcionalne i odvratajuće od činjenja krivičnih djela.

Inicijativu je dostavilo i udruženje PROI iz Sarajeva te predlaže da se u skladu sa odredbama Istanbulske konvencije uvede krivično djelo proganjanja, odnosno uhođenja što je uz modifikacije predložene odredbe i prihvaćeno, kako to nalaže i sama Konvencija.

Prilikom izrade ovog zakona ekspertna radna grupa imala je u vidu i zaključke Gradskog vijeća Gradačac, Gradskog vijeća Grada Sarajevo, Gradskog vijeća Grada Zenica i Gradsko vijeće Grada Tuzla kojima se, u bitnom, traži rigoroznije i oštrije procesuiranje slučajeva nasilja prema ženama, rodno zasnovanog nasilja, nasilja u porodici i femicida.

Doprinos je dostavila i Ženska mreža BiH u obliku jedinstvenog dokumenta sa prijedlozima za unapređenje Krivičnog zakona Federacije BiH koji su većim dijelom uz modifikacije i prilagodbu uvaženi, naročito u dijelu definiranja informaciono-komunikacijskih tehnologija.

Poslanik u Predstavničkom domu Parlamenta Federacije BiH Damir Nikšić, dostavio je prijedlog da se Krivični zakon Federacije BiH izmijeni na način da se uvede krivično djelo proganjanja koje će uključivati i cyber prostor što je i uvaženo obzirom na redefiniranje krivičnog djela proganjanja u članu 30. ovog zakona i definiranje pojma informaciono-komunikacijskih tehnologija.

„Ženska zagovaračka grupa“ dostavila je komentare na Nacrt zakona o izmjenama i dopunama Krivičnog zakona Federacije BiH, u kojem također predlažu da se za krivična djela protiv spolne slobode i morala, kao i za krivično djelo protiv braka, porodici i mladeži koja su učinjena na štetu djeteta ne mogu zamijeniti novčanom kaznom što je također usvojeno uz odgovarajuće korekcije. Predlaže se uvođenje sigurnosne mjere zabrane pristupa internetu, što ekspertna radna grupa nije prihvatila obzirom na nemogućnost kontroliranja provođenja takve mjere i sveprisutnost i široku dostupnost interneta. Međutim uvedene su nove sigurnosne mjere, zabrana približavanja i komunikacije sa žrtvom i udaljenje iz domaćinstva.

Doprinos javnoj raspravi dostavio je i Centar ženskih prava iz Zenice koji predlaže uvođenje pojma informacijsko-komunikacijskih tehnologija, što je i prihvaćeno, te izmjenu člana 193. važećeg Zakona kojim se predlaže intervencija u krivično djelo neovlašteno korištenje osobnih podataka, što je razmatrano i uz korekcije prihvaćeno. Također, predlaže se dopuna člana 222. nasilje u porodici na način da se u stavu (1) doda i nametljivo ponašanje, što nije prihvaćeno, te je predložena potpuna redefinicija krivičnog djela nasilja u porodici kojom se podiže stepen zaštite porodice, kako kroz inkriminaciju samog djela tako i putem krivičnih sankcija koje su oštrije.

Sarajevski otvoreni centar dostavio je prijedlog da se u predloženom članu kojim se definira krivično djelo silovanja, briše odredba kojom se predviđa kažnjavanje učinitelja koji je bio u otklonjivoj zabludi u pogledu pristanka. Ovaj prijedlog je sveobuhvatno razmatran i o istom je provedena stručna diskusija među članovima radne grupe, te je donesen zaključak da se isti odbije kao neosnovan uz uvažavanje argumentacije da isti kod osoba koje se ne bave krivičnim pravom može stvoriti zabunu u tumačenju. Naime propisivanjem otklonjive zablude u krivično djelo silovanja dodatno se pooštrava i dodatno štiti žrtva silovanja, jer ukoliko otklonjiva zabluda ne bi bila propisana ista se ne bi i kažnjavala. Prema tome propisivanjem otklonjive zablude u stavu (2) člana 203. kojim je propisano krivično djelo silovanja, podiže se stepen odgovornosti učinitelja ovog krivičnog djela i sužava prostor za njegovo oslobađanje od krivične odgovornosti.

Komentare na Nacrt zakona o izmjenama i dopunama Krivičnog zakona Federacije Bosne i Hercegovine dostavio je poslanik u Predstavničkom domu Parlamenta Federacije BiH, Dennis Gratz koji predlaže intervenciju u 65 članova Krivičnog zakona Federacije BiH, o čemu se Vlada Federacije Bosne i Hercegovine detaljno očitovala mišljenjem koje je utvrdila na 25. sjednici održanoj 09.01.2024. godine. Između ostalog, predlaže se uvođenje kazne doživotnog zatvora i pooštavanje kaznene politike. Kada je riječ o uvođenju kazne doživotnog zatvora, Vlada Federacije Bosne i Hercegovine je utvrdila mišljenje prema kojem uvođenje instituta kazne doživotnog zatvora ne bi bilo u suprotnosti sa Evropskom konvencijom o ljudskim pravima, (stajalište Evropskog suda o ljudskim pravima izraženo u predmetu Boden protiv Francuske), što podrazumijeva provođenje sveobuhvatne javne rasprave, što nije svrsishodno raditi u ovom trenutku obzirom da je riječ o pripremi teksta Zakona za drugo čitanje, dok je u odnosu na prijedlog ne samo poslanika Gratz već i cjelokupnog Parlamenta Federacije BiH koji se odnosi na pooštavanje kaznene politike, Vlada Federacije Bosne i Hercegovine dala jasno opredjeljenje i donijela zaključak kojim je obavezala obrađivača, odnosno Federalno ministarstvo pravde, da za krivična djela koja su predviđena ovim zakonom pooštri sankcije, što je obrađivač i učinio.

III. – USKLAĐENOST PROPISA S EVROPSKIM ZAKONODAVSTVOM

Prilikom izrade Zakona o izmjenama i dopunama Krivičnog zakona Federacije Bosne i Hercegovine, Federalno ministarstvo pravde je imalo u vidu Uredbu o Uredu Vlade Federacije BiH za zakonodavstvo i usklađenost s propisima Evropske unije („Službene novine Federacije BiH“, br. 26/20 i 76/20) i Uredbu o postupku usklađivanja zakonodavstva Federacije BiH s pravnom stečevinom Evropske unije („Službene novine Federacije BiH“, broj 98/16) i u tom smislu je izvršilo analizu evropske pravne stečevine. U skladu sa navedenim, Zakon je usklađen s Konvencijom Vijeća Evrope o prevenciji i borbi protiv nasilja prema ženama i nasilja u porodici i Konvencijom Vijeća

Evrope o zaštiti djece od seksualnog iskorištavanja i seksualne zloupotrebe, te Direktivom (EU) 2024/1385 Evropskog parlamenta i Vijeća od 14.maja 2024. godine o suzbijanju nasilja prema ženama i nasilja u porodici (SL L2024/1385).

IV. – OBRAZLOŽENJE PREDLOŽENIH ZAKONSKIH RJEŠENJA

Članom 1. ovog zakona jasno se navodi da se u krivično zakonodavstvo Federacije Bosne i Hercegovine djelimično preuzima Direktiva (EU) 2024/1385 Evropskog parlamenta i Vijeća od 14.maja 2024. godine o suzbijanju nasilja prema ženama i nasilja u porodici (SL L2024/1385).

Članom 2. ovog zakona mijenja se član 2. stav (12) i propisuje da je dijete osoba koja nije navršila 18 godina života, dok se izmijenjenim stavom (13) propisuje se da je mlađa punoljetna osoba ona osoba koja je u vrijeme učinjenja krivičnog djela navršila 18 a nije navršila 21 godinu života, čime se vrši usklađivanje s članom 3. Konvencije Vijeća Evrope o zaštiti djece od seksualnog iskorištavanja i seksualne zloupotrebe. Uvodi se nova definicija članova porodice, definicija bliske osobe, te definicija životnog partnera. Stavom (15) propisano je da su članovi porodici bračni ili bivši bračni partner i njihova djeca ili djeca svakog od njih, izvanbračni partneri ili bivši izvanbračni partneri i njihova djeca ili djeca svakog od njih, krvni srodnici i srodnici iz odnosa potpunog usvojenja u pravoj liniji bez ograničenja, a u pobočnoj liniji zaključno sa četvrtim stepenom, očuh, maćeha, usvojenik i usvojitelj iz odnosa nepotpunog usvojenja, srodnici po tazbini zaključno s drugim stepenom bez obzira na činjenicu da je bračna zajednica prestala, osobe koje vezuje odnos starateljstva i udomiteljstva, osobe koje žive ili su živjele u istom domaćinstvu bez obzira na srodstvo, osobe koje imaju zajedničko dijete ili je dijete začeto iako nikada nisu živjele u istom domaćinstvu, nezavisno od toga da li učinitelj dijeli ili je dijelio domaćinstvo sa žrtvom.

Stavom (16) definirano je da su bliske osobe članovi porodice, te životni partner, bivši životni partner, sadašnji ili bivši životni partner u emotivnoj ili intimnoj vezi, nezavisno od toga da li učinitelj dijeli ili je dijelio domaćinstvo sa žrtvom, dok je stavom (17) definirano da je životni partner osoba koja s drugom osobom živi u zajednici koja ima trajniji karakter. Navedene definicije su promijenjene u odnosu na Nacrt zakona, te se istima proširuje obuhvat, odnosno krug ljudi na koje se odnosi definicija, te se istima vrši usklađivanje s drugim zakonima i međunarodnim dokumentima. Stavom 39. uvodi se novi pojam u krivično zakonodavstvo Federacije Bosne i Hercegovine, informacijsko – komunikacijske tehnologije, koje se definiraju kao postupci, metode, elektronska sredstva i programi koji omogućavaju prikupljanje, čuvanje, obradu, upravljanje, prijenos i prezentaciju kompjuterskih podataka i informacija u elektronskom obliku, kao i mrežna komunikacijska oprema koja omogućava ostvarivanje komunikacije, traženje, slanje primanje i pristupanje kompjuterskim podacima i informacijama u elektronskom obliku.

Članom 3. ovog zakona vrši se izmjena naziva člana 9. i isti se usaglašava sa sadržajem istog, obzirom da se krivično zakonodavstvo u Federaciji Bosne i

Hercegovine ne primjenjuje prema djetetu koje u vrijeme učinjenja krivičnog djela nije navršilo 14 godina života.

Članom 4. ovog zakona mijenja se član 10. važećeg zakona, te se propisuje da se ovaj zakon, ako posebnim zakonom nije drugačije propisano, primjenjuje prema osobi koja je u vrijeme učinjenja krivičnog djela starija 14 godina i prema mlađim punoljetnim osobama.

Članom 5. ovog zakona propisuje se da odredbe općeg dijela ovog zakona primjenjuju prema djeci starijoj od 14 godina i mlađim punoljetnim osoba, osim ako posebnim zakonom nije drugačije propisano.

Članom 6. ovog zakona vrši se intervencija u član 16. kojim je propisan tok i prekid zastarjelosti krivičnog gonjenja, te se vrši usklađivanje s Konvencijom Vijeća Evrope o zaštiti djece od seksualnog iskorištavanja i seksualne zloupotrebe na način da se propisuje da za krivična djela trgovine ljudima i organizirane trgovine ljudima, krivična djela protiv spolne slobode i morala, krivična djela spolnog zlostavljanja i iskorištavanja djeteta, i krivična djela protiv braka, porodici i mladeži učinjenja na štetu djeteta, zastarjelost krivičnog gonjenja počinje teći od punoljetstva žrtve, što predstavlja dodatan instrument za zaštitu žrtve i garanciju krivičnog progona učinitelja ovih krivičnih dijela.

Članom 7. ovog zakona u članu 41. kojim se propisuju vrste kazni (kazna zatvora, kazna dugotrajnog zatvora i novčana kazna), dodaje se novi stav (2) te se propisuje da se učinitelju krivičnog djela iz koristoljublja novčana kazna može izreći kao sporedna i kada nije propisana zakonom ili kada je propisano da će se učinitelj kazniti kaznom zatvora ili novčanom kaznom, a sud kao glavnu izrekne kaznu zatvora.

Članom 8. ovog zakona vrši se intervencija u član 43. stav (3), te se propisuje da se kazna zatvora, koja ne može biti kraća od 30 dana niti duža od 20 godina, ne može izreći djeci starijoj od 14 godina. Propisuje se da se djeci starijoj od 14 godina može izreći kazna maloljetničkog zatvora pod uvjetima propisanim posebnim zakonom, čime se ovaj član usklađuje sa Zakonom o zaštiti i postupanju s djecom i maloljetnicima u krivičnom postupku.

Članom 9. ovog zakona vrši se intervencija u član 43a. stav (2) Zakona, te se propisuje da se kazna zatvora zamjenjuje novčanom kaznom tako što se svaki dan izrečene kazne zatvora izjednačuje sa 150 KM ako se novčana kazna utvrđuje u određenom iznosu, umjesto dosadašnjih 100 KM.

Također, u članu 43a. iza stava (3) dodaje se novi stav (4) kojim se propisuje da se kazna zatvora izrečena u trajanju do jedne godine ne može zamijeniti novčanom kaznom za krivična djela protiv ustavnog poretka Federacije, trgovine ljudima i organizirane trgovine ljudima, krivična djela protiv spolne slobode i morala, krivična

djela spolnog zlostavljanja i iskorištavanja djeteta, te krivična djela protiv braka, porodice i mladeži, čime se znatno pooštrava kaznena politika u Federaciji i šalje jasna poruka učiniteljima ovih djela.

Članom 10. ovog zakona vrši se intervencija u član 43c. stav (4), te se propisuje da se osobama osuđenima za krivična djela protiv braka, porodice i omladine ne može odrediti izvršenje kazne zatvora sa elektronskim nadzorom. Navedenom intervencijom, također jasno se pooštrava kaznena politika u Federaciji i ukidaju povlastice za učinitelje krivičnih djela protiv braka, porodice i mladeži.

Članom 11. ovog zakona vrši se intervencija u član 47. stav (3), te se propisuje da najniži iznos novčane kazne ne može biti manji od 1000 KM, umjesto dosadašnjih 500 KM.

Članom 12. ovog zakona vrši se intervencija u član 48. stav (3), te se vrši intervencija u institut zamjene novčane kazne tako što će se za svakih započelih 150 KM novčane kazne odrediti jedan dan zatvora, umjesto dosadašnjih 100 KM.

Članom 13. ovog zakona uvodi se novi stav kojim se propisuju opća pravila za odmjeravanje kazne, te se propisuje da se kod odmjeravanja kazne za krivična djela protiv života i tijela, trgovine ljudima i organizirane trgovine ljudima, krivična djela protiv spolne slobode i morala, krivična djela spolnog zlostavljanja i iskorištavanja djeteta i krivična djela protiv braka, porodice i mladeži, ne mogu uzeti kao olakotne okolnosti kultura, običaji, religija, tradicija i takozvana čast.

Članom 14. ovog zakona vrši se intervencija u član 51. stav (1) tačka e) te se propisuje da sud može ublažiti kaznu za krivično djelo za koje je propisana kazna zatvora do jedne godine na kaznu zatvora u trajanju do 30 dana. Također, propisuje se da ako je za krivično djelo propisana novčana kazna s naznakom najmanje mjere, kazna se može ublažiti do pet dnevnih iznosa, a ako se izriče u određenom iznosu do 1000 KM.

Članom 15. ovog zakona u članu 54. stav (5) vrši se tehničko usklađivanje na način da se iza riječi „jedinstvenu kaznu“ dodaje se riječ: „zatvora“.

Članom 16. ovog zakona vrši se intervencija u član 57. stav (3) važećeg Zakona, te se propisuje da se pri svakom uračunavanju izjednačava dan pritvora, dan lišenja slobode, dan maloljetničkog zatvora, dan zatvora, dan dugotrajnog zatvora i iznos od 150 KM, umjesto dosadašnjih 100 KM.

Članom 17. ovog zakona vrši se intervencija u član 71. važećeg Zakona, te se uvode nove sigurnosne mjere: zabrana približavanja i komunikacije sa žrtvom i udaljenje iz domaćinstva.

Članom 18. ovog zakona definiraju se sigurnosne mjere zabrane približavanja i komunikacije sa žrtvom i sigurnosna mjera udaljenja iz domaćinstva. Učinitelju krivičnog djela protiv života i tijela, krivičnog djela protiv spolne slobode i morala, krivičnog djela spolnog zlostavljanja i iskorištavanja djeteta, krivičnog djela protiv braka, porodice i mladeži kao i krivičnog djela uhođenja, može se izreći sigurnosna mjera zabrane približavanja i komunikacije sa žrtvom, ako postoji opasnost da bi učinitelj mogao ponoviti takvo krivično djelo. Sigurnosna mjera zabrane približavanja i komunikacije sa žrtvom uključuje zabranu približavanja žrtvi na određenoj udaljenosti, zabranu pristupa u prostor oko mjesta stanovanja ili mjesta rada žrtve, kao i zabranu uznemiravanja ili komunikacije sa žrtvom, bilo putem informacijsko – komunikacijskih tehnologija, koje su ovim zakonom uvedene kao novi pojam, ili na drugi način. Sigurnosnu mjeru udaljenja iz domaćinstva sud može izreći učinitelju krivičnog djela protiv života i dijela, krivičnog djela protiv spolne slobode i morala, krivičnog djela spolnog zlostavljanja i iskorištavanja djeteta, krivičnog djela protiv braka, porodice mladeži, ako postoji opasnost da bi učinitelj mogao ponovo učiniti krivično djelo prema članu domaćinstva. Obje sigurnosne mjere ne mogu biti kraće od šest mjeseci niti duže od pet godina.

Članom 19. briše se Glava X. – PRAVILA O ODGOJNIM PREPORUKAMA, O ODGOJNIM MJERAMA I O KAŽNJAVANJU MALOLJETNIKA, odnosno čl. 79. do 109., obzirom da je na snagu stupio Zakon o zaštiti i postupanju s djecom i maloljetnicima u krivičnom postupku.

Članom 20. ovog zakona vrši se terminološko usklađivanje.

Članom 21. ovog zakona vrši se intervencija na član 112. tako što se stav (1) mijenja te se propisuje da osoba koja je osuđena na kaznu zatvora, ili kaznu dugotrajnog zatvora, koja je sposobna za rad, može raditi ukoliko na to pristane.

Članom 22. ovog zakona vrši se intervencija u član 113. Zakona kojim se propisuje izvršenje kazne maloljetničkog zatvora, te se propisuje da se prema osobi koja je navršila 16 godina, kazna maloljetničkog zatvora izvršava u posebnim kazneno – popravnim ustanovama za maloljetnike. Prema osobi koja je navršila 18 godina života, ali nije navršila 23 godine života, kazna maloljetničkog zatvora se izvršava u posebnim ustanovama za mlađe punoljetne osobe ili u posebnom odjeljenju ustanove u kojoj se kazna izvršava prema punoljetnim osobama, pri čemu se osigurava da ne dođu u kontakt sa starijim zatvorenicima. Prema osobi koja je navršila 23 godine života prije kraja izdržavanja kazne, ostatak kazne se izvršava u kazneno – popravnoj ustanovi za odrasle.

Članom 23. ovog zakona vrši se intervencija u član 121. stav (1), te se institut rehabilitacije terminološki usklađuje.

Članom 24. ovog zakona vrši se intervencija na član 125. stav (4) te se propisuje da se osuda na kaznu dugotrajnog zatvora i osuda zbog krivičnih djela spolnog zlostavljanja i iskorištavanja djeteta, te krivičnih djela trgovina ljudima i organizirana trgovina ljudima učinjenih na štetu djeteta, ne briše. U odnosu na nacrt Zakona, proširen je krug djela za koja se kazna ne briše na krivična djela trgovine ljudima i organizirane trgovine ljudima učinjenih na štetu djeteta.

Članom 25. ovog zakona vrši se intervencija na član 166. stav (2) te se propisuje da će se kaznom zatvora najmanje deset godina ili kaznom dugotrajnog zatvora kazniti onaj ko usmrti člana porodici ili blisku osobu koju je prethodno zlostavljao i ko usmrti dijete ili trudnu ženu, čime se vrši usklađivanje s članom 35. Istanbulske konvencije.

Članom 26. ovog zakona vrši se intervencija u član 170. stav (1) kojim se propisuje krivično djelo učestvovanja u samoubistvu, te se propisuje da će se kaznom zatvora od šest mjeseci do pet godina kazniti ko navede drugog na samoubistvo ili mu pomogne u samoubistvu pa ono bude učinjeno ili pokušano. Stavom (2) propisuje se da će se učinitelj, ukoliko predmetno djelo učini prema djetetu koje je navršilo 14 godina ili prema osobi čija je sposobnost shvaćanja značenja svog djela ili upravljanja svojim postupcima bitno smanjena, kazniti kaznom zatvora od jedne do deset godina. Također, stavom (3) se propisuje da će se učinitelj koji učini djelo iz stava (1) ovog člana prema djetetu koje nije navršilo 14 godina ili prema osobi koja nije mogla shvatiti značaj svog djela ili upravljati svojim postupcima, kazniti u skladu sa članom 166. (Ubistvo) stav (1) ovoga zakona. Stavom (4) predmetnog člana propisuje se da će se kaznom zatvora od šest mjeseci do tri godine kazniti ko okrutno ili nečovječno postupa s osobom koja se prema njemu nalazi u odnosu kakve podređenosti ili zavisnosti i time iz nehata izazove samoubistvo ili pokušaj samoubistva te osobe.

Članom 27. ovog zakona vrši se intervencija u član 171., te se krivično djelo protupravnog prekida trudnoće usklađuje s članom 39. i 46. Istanbulske konvencije.

Članom 28. ovog zakona vrši se izmjena člana 172. kojim se propisuje krivično djelo teške tjelesne ozljede. Stavom (1) propisuje se da ko drugoga teško tjelesno ozlijedi ili mu zdravlje teško naruši, da će se kazniti kaznom zatvora od šest mjeseci do pet godina. Ko drugog tjelesno ozlijedi ili mu zdravlje naruši tako teško da je zbog toga doveden u opasnost život ozlijeđenog ili je uništen ili trajno i u znatnoj mjeri oslabljen koji važan dio njegova tijela ili koji važan organ ili je prouzrokovana trajna nesposobnost za rad ozlijeđenog ili trajno i teško narušenje njegovog zdravlja ili unakaženost, kaznit će se kaznom zatvora od jedne do osam godina. Stavom (3) propisano je da ako ozlijeđeni umre zbog navedenih ozljeda, učinitelj će se kazniti kaznom zatvora od dvije do 12 godina. Ako su navedena krivična djela učinjena prema djetetu ili trudnoj ženi ili članu porodici ili bliskoj osobi ili prema osobi koja je posebno ranjiva zbog teže tjelesne ili duševne smetnje ili iz mržnje, zakonodavac predviđa kaznu zatvora od jedne do osam godina (za djelo iz stava 1), od dvije do deset godina (za djelo iz stava 2) i od tri do 15 godina (za djelo iz stava 3).

Stavom (5), propisuje se da ko krivično djelo iz st. (1) i (2) učini iz nehata, kaznit će se kaznom zatvora do tri godine, a ko krivično djelo iz st. (1) do (3) učini na mah, doveden bez svoje krivnje u jaku razdraženost ili prepast napadom, zlostavljanjem ili teškim vrijeđanjem od ozlijeđenog, kaznit će se za krivično djelo iz st. (1) i (2) kaznom zatvora do tri godine, a za krivično djelo iz stava (3) kaznom zatvora od šest mjeseci do pet godina.

Članom 29. ovog zakona vrši se intervencija u član 173. stav (2) te se uvodi kvalificirana okolnost za učinitelja krivičnog djela laka tjelesna ozljeda ukoliko isto učini prema članu porodici ili bliskoj osobi, prema djetetu ili trudnoj ženi, osobi koja je posebno ranjiva zbog njezine teže tjelesne ili duševne smetnje ili iz mržnje. Predmetnim članom briše se stav (3) i mogućnost izricanja sudske opomene.

Članom 30. ovog zakona dodaju se novi čl. 173a. Sakaćenje ženskih spolnih organa i 173b. Prinudna sterilizacija čime se vrši usklađivanje predmetnog zakona sa čl. 38., 39. i 46. Istanbulske konvencije.

Članom 31. ovog zakona dodaje se novi član 179a. Uhođenje, kojim se vrši usklađivanje predmetnog zakona sa članom 34. Istanbulske konvencije. U odnosu na usvojeni Nacrt zakona izvršena je redefinicija krivičnog djela Uhođenja, te je predviđeno da se isto može vršiti i putem informacijsko – komunikacijskih tehnologija.

Članom 32. ovog zakona vrši se intervencija u član 180. stav (2) te se brišu riječi ili maloljetniku, čime se vrši usklađivanje sa definicijom pojma djeteta.

Članom 33. ovog zakona dodaje se novi član 181a. te se propisuje krivično djelo Prinuda i član 181b. Psihičko nasilje. Ko drugog zlostavlja ili prema njemu postupa na način kojim se vrijeđa ljudsko dostojanstvo i time naruši njegov psihički integritet, kaznit će se kaznom zatvora do jedne godine. Stavom (2) predviđen je kvalificirani oblik krivičnog djela psihičkog nasilja ukoliko je ono učinjeno prema djetetu ili prema osobi posebno ranjivoj zbog teže tjelesne ili duševne smetnje ili iz mržnje, ili putem informacijsko – komunikacijskih tehnologija.

Članom 34. ovog zakona vrši se intervencija u član 183. na način da se briše stav (3) obzirom da su odredbe koje propisuje predmetni stav inkriminirane krivičnim djelom Uhođenje.

Članom 35. ovog zakona vrši se intervencija u član 189. Neovlašćeno optičko snimanje i mijenja se stav (3) obzirom da je isti obuhvaćen krivičnim djelom Iskorištavanje djeteta radi pornografije. Također, propisuje se novi stav (3) prema kojem će se oduzeti predmeti koji su bili namijenjeni ili upotrijebljeni za učinjenje krivičnog djela iz st. (1) i (2) ovoga člana i predmeti koji su nastali učinjenjem tih krivičnih djela.

Članom 36. ovog zakona vrši se intervencija u važeći zakon tako što se uvodi novi član 189a. i novo krivično djelo Zloupotreba snimke spolno eksplicitnog sadržaja, čime krivično zakonodavstvo Federacije BiH prati razvoj tehnologije i malicioznih društvenih ponašanja.

Članom 37. ovog zakona vrši se izmjena člana 193. Zakona kojim je propisano krivično djelo neovlašćenog korištenja osobnih podataka, te se propisuje da ko protivno uvjetima određenim u zakonu prikuplja, obrađuje ili koristi osobne podatke fizičkih osoba, kaznit će se kaznom zatvora do jedne godine. Stavom (2) propisano je da ako krivično djelo iz stava (1) počini službena ili odgovorna osoba u vršenju službe ili javnih ovlasti, kaznit će se kaznom zatvora do tri godine. Navedenom intervencijom, osim jasnijeg definiranja radnji krivičnog djela neovlašćenog korištenja osobnih podataka, te uvođenja kvalificiranog oblika ukoliko djelo počini službena ili odgovorna osoba u vršenju službe ili javnih ovlasti, pooštrene su i sankcije, brisana je mogućnost izricanja novčane kazne i povećan je zakonski maksimum sa šest mjeseci na tri godine.

Članom 38. ovog zakona uvodi se novi član 193a. Neovlašćeno objavljivanje i prikazivanje spisa, portreta i snimaka. Ko neposredno ili putem informacijsko – komunikacijske tehnologije objavi ili prikaže spis, portret, fotografiju, film ili drugi sadržaj osobnog karaktera bez pristanka osobe koja je spis sastavila ili na koju se spis odnosi, koja je prikazana na portretu, fotografiji, filmu ili čiji je glas snimljen na fonografu ili bez pristanka osobe čiji se pristanak po zakonu traži, kaznit će se novčanom kaznom ili kaznom zatvora do tri godine, dok je za kvalificirani oblik djela, ukoliko ga počini službena osoba ili odgovorna osoba u vršenju službe ili javnih ovlasti, predviđena kazna zatvora u trajanju od šest mjeseci do pet godina. U odnosu na Nacrt zakona, ovo djelo je novina i uvedeno je u skladu sa zahtjevima društvene zajednice kako bi se zaštitila privatnost spisa, portreta i snimka osobnog karaktera.

Članom 39. ovog zakona mijenja se važeći član 203. kojim je definirano krivično djelo Silovanja i isto se u potpunosti usklađuje s članom 36. Istanbulske konvencije. Stavom (1) propisano je da ko s drugom osobom bez njezina pristanka izvrši spolni odnošaj ili s njim izjednačenu spolnu radnju ili navede drugu osobu da bez svog pristanka s trećom osobom izvrši spolni odnošaj ili s njim izjednačenu spolnu radnju ili da bez svog pristanka sama nad sobom izvrši sa spolnim odnošajem izjednačenu spolnu radnju, kaznit će se kaznom zatvora od jedne do pet godina. Stavom (2) propisuje se i kažnjavanje ukoliko je učinitelj bio u otklonjivoj zabludi u pogledu postojanja pristanka, i to u trajanju do tri godine, čime se pooštrava kaznena politika i kriminalizira počinjenje krivičnog djela silovanja u slučaju otklonjive zablude. Stavom (3) propisano je da ko drugu osobu upotrebom sile ili prijetnje da će izravno napasti na njezin život ili tijelo ili na život ili tijelo njoj bliske osobe prisili na spolni odnošaj ili s njim izjednačenu spolnu radnju, na spolni odnošaj ili s njim izjednačenu spolnu radnju s trećom osobom ili nad samom sobom izvrši spolni odnošaj ili s njom izjednačenu spolnu radnju, kaznit će se kaznom zatvora od jedne do deset godina. Stavom (4) propisuje se da ako je djelo iz stava (1) učinjeno prema članu porodici ili bliskoj osobi ili prema osobi koja je posebno

ranjiva zbog bolesti, ovisnosti, trudnoće, invaliditeta, teže tjelesne ili duševne smetnje ili prema djetetu starijem od 15 godina ili na osobito okrutan ili osobito ponižavajući način ili iz mržnje ili zajedno s jednim ili više učinitelja pri čemu je prema istoj osobi izvršeno više spolnih odnošaja ili s njim izjednačenih spolnih radnji ili uz upotrebu oružja ili opasnog oruđa ili ako je silovana osoba teško tjelesno ozlijeđena ili je ostala trudna, kaznit će se kaznom zatvora od tri do 12 godina. Stavom (5) propisano je ko djelo iz stava (3) učini pod okolnostima iz stava (4), da će se kazniti kaznom zatvora od pet do 15 godina. Stavom (6) propisano je da će se učinitelj kazniti kaznom zatvora od najmanje pet godina ako je krivičnim djelom iz stava (1) i (2) prouzrokovana smrt osobe. Stavom (7), propisano je da pristanka na spolni odnošaj ili s njim izjednačenu spolnu radnju nema ako je isto izvršeno uz upotrebu prijetnje, prijevare, zloupotrebe položaja prema osobi koja se prema učinitelju nalazi u odnosu zavisnosti, iskorištavanja stanja osobe zbog kojeg ona nije bila sposobna izraziti svoje odbijanje ili nad osobom kojoj je protupravno oduzeta sloboda.

Članom 40. ovog zakona dodaje se novi član 203a. (Spolno uznemiravanje) koje je u potpunosti usklađeno s članom 40. Istanbulske konvencije. Spolno uznemiravanje je svako verbalno, neverbalno ili fizičko neželjeno ponašanje spolne prirode koje ima za cilj ili stvarno predstavlja povredu dostojanstva osobe, koje uzrokuje strah, neprijateljsko, ponižavajuće ili uvredljivo okruženje. Propisano je da se spolno uznemiravanje može vršiti i putem informacijsko – komunikacijskih tehnologija.

Članom 41. ovog zakona vrši se intervencija u važeći zakon tako što se čl. 204., 205., 206. i 207. kojima su propisana krivična djela Spolni odnošaj s nemoćnom osobom, Spolni odnošaj zloupotrebom položaja, Prinuda na obljubu i Spolni odnošaj s djetetom brišu, obzirom da su radnje predviđene tim djelima obuhvaćene novim krivičnim djelima.

Članom 42. ovog zakona izmijenjen je član 208. (Bludne radnje) na način da je propisano da će se u slučajevima iz člana 203. (Silovanje) ovog zakona, kada nije učinjen ni pokušaj tog krivičnog djela, onaj ko učini samo bludnu radnju kazniti kaznom zatvora od tri mjeseca do tri godine, dok će se učinitelj predmetnog djela prema djetetu starijem od 15 godina kazniti kaznom zatvora do tri godine. Ako djelo iz stava (2) učini srodnik po krvi u pravoj liniji do bilo kojeg stepena, u pobočnoj liniji zaključno s četvrtim stepenom, očuh, maćeha, usvojitelj, staratelj, nastavnik, odgojitelj, liječnik, vjerski službenik ili druga osoba kojoj je dijete povjereno radi učenja, odgoja, čuvanja, staranja ili njege, učinitelj će se kazniti kaznom zatvora od jedne godine do pet godina. U odnosu na Nacrt zakona, podignut je zakonski minimum kazne zatvora sa šest mjeseci na jednu godinu.

Članom 43. ovog zakona briše se član 209. kojim je definirano krivično djelo Zadovoljenje pohote pred djetetom ili maloljetnikom, obzirom da je isto propisano novim članom 210f.

Članom 44. ovog zakona iza člana 201b., dodaje se nova Glava XIXa. - Krivična djela spolnog zlostavljanja i iskorištavanja djeteta. Članom 210c. uvodi se krivično djelo Spolni odnošaj s djetetom mlađim od 15 godina koje je u potpunosti usklađeno s članom 18. Lanzarote konvencije. Također, članom 210d. uvodi se krivično djelo Spolna zloropotreba djeteta starijeg od 15 godina koji je također usklađeno s članom 18. Lanzarote konvencije, dok je članom 210e. uvedeno krivično djelo Mamljenje djece za zadovoljenje spolnih potreba, koje u potpunosti usklađeno s članom 23. Lanzarote konvencije. Članom 210f. uvodi se krivično djelo Zadovoljenje pohote pred djetetom koje je u potpunosti usklađeno s članom 22. Lanzarote konvencije, članom 210g. krivično djelo Navođenje djeteta na prostituciju koje u potpunosti usklađeno s članom 19. i 28. Lanzarote konvencije, članom 210h. Iskorištavanje djeteta radi pornografije koji je u potpunosti usklađen s članom 20. i 28. Lanzarote konvencije, član 210i. krivično djelo Iskorištavanja djeteta za pornografske predstave koje je u potpunosti usklađeno s članom 21. Lanzarote konvencije i član 210j. krivično djelo Upoznavanje djeteta s pornografijom koje je u potpunosti usklađeno s članom 20. Lanzarote konvencije.

Članom 45. ovog zakona brišu se čl. 211, 212. i 213., obzirom da je član 211. obuhvaćen članom 210h., da je član 212. obuhvaćen članom 210j., i da je član 213. obuhvaćen članom 222a.

Članom 46. ovog zakona iza člana 215. dodan je novi član 215a. kojim se uvodi krivično djelo Prisilno sklapanje braka koje je u potpunosti usklađeno s članom 37. Istanbulske konvencije.

Članom 47. ovog zakona izvršena je izmjena krivičnog djela Izvanbračne zajednice s djetetom koje nije navršilo 16 godina, te je definirano da će se punoljetna osoba koja izvanbračno živi s djetetom koje nije navršilo 16 godina života kazniti kaznom zatvora od tri mjeseca do tri godine. U odnosu na Nacrt zakona povećan je zakonski minimum na tri mjeseca.

Članom 48. ovog zakona izvršena je izmjena krivičnog djela iz člana 217. te je izvršeno usklađivanje sukladno definiciji djeteta.

Članom 49. ovog zakona izvršena je intervencija u član 218., odnosno pooštavanje kaznene politike za krivično djelo Promjena porodičnog stanja.

Članom 50. ovog zakona izvršeno je usklađivanje krivičnog djela iz člana 219. Zapuštanje ili zlostavljanje djeteta u skladu s definicijom pojma djeteta.

Članom 51. ovog zakona iza člana 219. dodan je novi član 219a. te je uvedeno novo krivično djelo Povreda privatnosti djeteta, koje je u potpunosti usklađeno s Konvencijom o pravima djeteta. Predmetnom odredbom štiti se pravo djeteta na privatnost i porodični život, što je od iznimnog značaja obzirom na ubrzani razvoj

sredstava masovne komunikacije i kompjuterskih mreža. Stavom (2) predviđeno je izvršenje krivičnog djela putem informacijsko – komunikacijskih tehnologija.

Članom 52. ovog zakona vrši se intervencija u član 220., odnosno vrši se usklađivanje kaznene politike za krivično djelo napuštanje djeteta.

Članom 53. ovog zakona mijenja se član 222. kojim je propisano krivično djelo Nasilje u porodici. U odnosu na važeći Zakon kazne su značajno pooštrene, prije svega u odnosu na osnovni oblik djela za koji je podignut zakonski maksimum, te za djelo nasilja u porodici uslijed kojeg je nastupila smrt člana porodice ili domaćinstva ili bliske osobe na način da je podignut zakonski minimum sa dvije na tri godine. Stavom (1) propisano je da će se kaznom zatvora do tri godine kazniti ko fizičkim, seksualnim, psihičkim ili ekonomskim nasiljem ugrožava mir, tjelesnu, seksualnu, psihičku ili ekonomsku cjelovitost člana svoje porodice ili domaćinstva ili bliske osobe, nezavisno od toga da li učinitelj dijeli ili je dijelio domaćinstvo sa žrtvom. Ako je prilikom počinjenja djela iz stava (1) upotrijebljeno oružje, opasno oruđe ili drugo sredstvo prikladno teško ozlijediti tijelo ili narušiti zdravlje, učinitelj će se kazniti kaznom zatvora od tri mjeseca do tri godine. Ako je krivičnim djelom iz st. (1) i (2) član porodice ili domaćinstva ili bliska osoba teško tjelesno ozlijeđena ili joj je zdravlje teško narušeno ili ako je krivično djelo iz st. (1) i (2) učinjeno prema djetetu, učinitelj će se kazniti kaznom zatvora od jedne do pet godina. Ako je krivičnim djelom iz st. (1) do (3) prouzrokovana smrt člana porodici ili domaćinstva ili bliske osobe, učinitelj će se kazniti kaznom zatvora od tri do 15 godina.

Članom 54. ovog zakona iza člana 222. dodaje se novi član 222a. Rodoskrvuće te je propisano da će se novčanom kaznom ili kaznom zatvora od tri mjeseca do tri godine kazniti ko izvrši spolni odnošaj ili s njim izjednačenu spolnu radnju s krvnim srodnikom u pravoj liniji ili s bratom ili sestrom. Stavom (2) propisan je kvalificirani oblik ovog djela ukoliko se isto učini prema djetetu.

Čl. 55. i 56. ovog zakona izvršeno je terminološko usklađivanje u čl. 224. i 231. stav (5).

Članom 57. izvršena je izmjena člana 237. kojim je propisano krivično djelo Služenja alkoholnih pića djetetu te je isto usklađeno s pojmom djeteta.

Čl. 58. i 59. izvršena je terminološka intervencija u član 239. stav (2) i 345. stav (4).

Članom 60. ovog zakona uvodi se novi član 353a. i novo krivično djelo Kršenje zabrane utvrđene sigurnosnom mjerom, te se propisuje da će se novčanom kaznom ili kaznom zatvora do tri godine kazniti ko prekrši zabranu utvrđenu sigurnosnom mjerom izrečenom pravosnažnom sudskom odlukom.

Članom 61. ovog zakona dodaje se novi član 239b. i novo krivično djelo Prisila prema zdravstvenom radniku, kojim se štiti obavljanje zdravstvene djelatnosti kao javne službe.

Članom 62. ovlašćuju se Zakonodavno – pravna komisija Predstavničkog doma i Zakonodavno – pravna komisija Doma naroda Parlamenta Federacije Bosne i Hercegovine da u roku od šest mjeseci od dana stupanja na snagu ovog zakona utvrde Prečišćeni tekst Krivičnog zakona Federacije Bosne i Hercegovine, imajući u vidu da je osnovni tekst ovog propisa mijenjan, odnosno dopunjavan više od tri puta, te da bi Prečišćeni tekst olakšao praćenje sadržaja istog.

Članom 63. propisuje se stupanje na snagu ovog zakona.

V. – FINANSIJSKA SREDSTVA

Za provođenje ovog zakona nije potrebno osigurati dodatna sredstva u budžetu Federacije Bosne i Hercegovine.